

# CBETA電子佛典集成

---

CBETA Chinese Electronic Tripitaka Collection  
ebook

X69n1371

## 介石智朋禪師語錄

(參學侍者)正賢·宗坦·  
延輝·淨球·智瑾·志謀·  
祖閻編

# 目次

- [編輯說明](#)
- [章節目次](#)
  - [No. 1371-A 介石禪師語錄](#)
  - [目次](#)
  - [介石和尚初住溫州鴈山羅漢禪寺語錄](#)
  - [臨安府臨平山佛日淨慧禪寺語錄](#)
  - [慶元府大梅山保福禪寺語錄](#)
  - [慶元府香山孝慈直應禪寺語錄](#)
  - [婺州雲黃山寶林禪寺語錄](#)
  - [平江府承天能仁禪寺語錄](#)
  - [安吉州柏山崇恩資壽禪寺語錄](#)
  - [臨安府淨慈報恩光孝禪寺語錄](#)
  - [小參](#)
  - [拈古](#)
  - [法語](#)
    - [示瑞侍者\(偃谿小師\)](#)
    - [示心傳二上人往太白](#)
    - [示西禪淇上人](#)
    - [示祖上人](#)
  - [偈頌](#)
    - [天衣生緣](#)
    - [拜明招塔](#)
    - [水庵生緣](#)
    - [拜明教塔](#)
    - [蘇谿牧護坐禪巖](#)
    - [先羅漢塔](#)
    - [佛蹟](#)
    - [布袋腳跡石上現](#)
    - [韶光庵](#)
    - [靈空歸蜀](#)
    - [鄙翁住菁山庵](#)
    - [鰲山接待](#)
    - [顯誰蒼\(誰今畫見松源\)](#)
    - [惠山煎茶](#)

- [靈隱得猿](#)
- [鑑維那歸蜀](#)
- [與福上人](#)
- [贈壽上人](#)
- [送璩上人](#)
- [復首座出世上雪竇](#)
- [送焦山淇上人見廣祐](#)
- [送鴈宕慶藏主](#)
- [珙上人求](#)
- [了翁](#)
- [古鏡](#)
- [夢宇](#)
- [幻菴](#)
- [瞎翁](#)
- [古航](#)
- [壽秀王八十](#)
- [隱室](#)
- [讚佛祖](#)
  - [出山相](#)
  - [行道觀音](#)
  - [獅子相觀音](#)
  - [魚籃觀音](#)
  - [觀音](#)
  - [踏蓮葉觀音](#)
  - [布袋和尚\(三\)](#)
  - [渡蘆達磨\(二\)](#)
  - [豐干](#)
  - [寒山](#)
  - [拾得](#)
  - [寒拾\(放帚坐對崖石看月\)](#)
  - [船子和尚](#)
  - [郁山主](#)
  - [政黃牛](#)
  - [朝陽穿破衲\(二\)](#)
  - [對月了殘經\(二\)](#)
  - [無準和尚](#)
  - [大歇和尚](#)
  - [東坡](#)

- [淵明](#)
- [楊知府](#)
- [小佛事](#)
  - [心監寺入塔](#)
  - [定典座入塔](#)
  - [權上座火](#)
  - [貫上座起龕](#)
  - [潤維那入塔](#)
  - [凝知客火](#)
  - [廣老宿火](#)
  - [宗南谷首座秉炬](#)
  - [育王無住和尚起龕](#)
  - [承天石山和尚入祖堂](#)
- [卷目次](#)
  - 1.
- [贊助資訊](#)

## 編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

## No. 1371-A 介石禪師語錄

介石在南山。余嘗一見之。道貌充然。出語警峭。為其鄉人也愛之。為其名輩也敬之。寂久矣。侍者晨恢景徹。乃以此錄。遠求著語。余曰。有句無句如藤倚樹。橫說豎說如水漉月。師既如此供通如此漏逗。我又如何分雪。雖然。師嘗七見浙翁。末後因黃龍三關公案。遂得浙翁一拳打失鼻孔。有許懺切。有許作略。生平受用不盡。又欲分付後人。究竟果為誰底。介石耶浙翁耶黃龍耶。古人有云。一字三寫焉烏成馬。何況又有上碑石者。又有下注脚者。莫將黑豆換却眼睛。則木馬嘶風泥牛入海去也。

咸淳戊辰閏正月十有五日。竹溪禱齋林(希逸)書。

No. 1371

介石和尚語錄

### 目次

- 初住溫州鴈山羅漢禪寺語錄
- 臨安府臨平山佛日淨慧禪寺語錄
- 慶元府大梅山保福禪寺語錄
- 慶元府香山孝慈真應禪寺語錄
- 婺州雲黃山寶林禪寺語錄
- 平江府承天能仁禪寺語錄
- 安吉州拍山崇恩資壽禪寺語錄
- 臨安府淨慈報恩光孝禪師語錄
- 小參
- 拈古
- 法語
- 偈頌
- 讚佛祖
- 小佛事

### 介石和尚初住溫州鴈山羅漢禪寺語錄

參學 正賢 編

師於紹定二年。二月初三日。入院。  
指三門云。不立孤危。了無藏覆。掉臂因行。推門入臼。

佛殿。佛身無為。不墮諸數。土塊泥團。燈籠露柱。插香云。鳳棲不在梧桐樹。

踞方丈。千鈞之弩。不為鼯鼠發機。推向萬仞懸崖。須自放身捨命。拍禪床云。惜取眉毛。

指法座。步步登高底。擡脚不起。擡脚不起底。步步登高。新羅漢又且如何。驟步云。一二三四五。遂陞座。拈香云。此一瓣香。恭為祝延今上皇帝。聖躬萬歲萬歲萬萬歲。皇帝陛下。恭願。卜年卜世。更期周曆之長。多壽多男。願獻華封之祝。

次拈香云。鐘阜太白凌霄。少雪老到洞山之兩度。佛手生緣驢脚。痛乞兒露窮相之一拳。爇向爐中。奉為前任徑山興聖萬壽禪寺。特賜佛心禪師漸翁大和尚。用酬法乳之恩。迺就座云。太平無象。王道無私。罷却干戈。正好相見。

僧問。龍淵深處。頭角崢嶸。鴈宕山巔。曇花應瑞。作麼生是為人底句。師云。靈龜突出最高峰。進云。與麼則。皇恩佛恩一時報畢。師云。謝闍黎證明。進云。三聖道。我逢人即出。出即不為人。是如何。師云。竭海尋珠。進云。興化道。我逢人即不出。出則便為人。師云。登山捧月。進云。二大老與麼說話。相去多少。師云。一等春風百樣花。進云。向上還有事也無。師云。就中此景難圖錄。僧斫額云。今日親見諾訶羅尊者。師云。猶隔海在。進云。爭奈佛手難遮。師云。禮拜著。進云。今日小出大遇。僧禮拜。

師迺云。靈山付囑。黃葉止啼。少室安心。擔雪填井。一錯百錯。錯到如今。朋上座平時水邊林下。不求諸聖。不慕己靈。又誰管你天。又誰管你地。無端失脚墮此群隊。不免將錯就錯。向荊棘林中。七縱八橫。成此罪業去也。拍禪床云。一片月生海。幾家人上樓。舉古德問僧。甚處來。僧云。雪峰來。古德云。我當時到彼。事事不足。如今足也未。僧云足。古德云。粥足飯足。僧無語。師云。不貪香餌。始是錦鱗。不墮網羅。方為瑞獸。這僧不會藏身。帶累古德。重施陷穽。要知麼。無事自然隨勢去。有聲多為不平來。

小參。舉一不得舉二。放過一著。拈拄杖云。諾訶羅尊者來也。向萬仞崖頭。撒出一派。如雷如霆如電如霧。如珠如霰如虹如雨。百千萬變。無有窮盡。盡天下人向這裏眼瞪地。直饒拶透嶮崖截斷源頭。與尊者未有相見分在。況我衲僧門下。猶隔千里萬里。卓拄杖云。雲行雨施。三草二木。舉仰山一日忽見異僧乘空而至立於前。仰云。近離甚處。僧云。早晨離西天。仰云。何太遲生。僧云。遊山翫水。仰云。神通妙用不無闍黎。佛法須還老僧。僧云。

特來東土禮文殊。却遇小釋迦。遂出西天貝多葉。與仰山作禮。乘空而去。

師云。盡謂這僧虛空裏來。虛空裏去。不與截斷脚跟。令歸家穩坐。返被兩杓惡水。殊不知。這僧被仰山兩拶。便迺奔東走西。喚鐘作甕。若使盡令而行。未有承當分在。

謝兩班上堂。聲前句後。全放全收。斗換星移。半明半暗。且圖共樂昇平。總瞞諸人不得。何故。入鄉隨俗。

上堂。北鬱單越西瞿耶尼。有利無利不離行市。拈拄杖云。你有拄杖子。我與你拄杖子。你無拄杖子。我奪你拄杖子。靠拄杖云。船子下揚州。黃金如糞土。喝一喝。

元宵上堂。一燈分燈燈無盡。一處明處處齊透。鬧浩浩中一法不捨。靜悄悄處一塵不受。燈明如來一場漏逗。

二月半上堂。春事正繁。黃面老子命根未斷。正當此時。殺活在諸人手裏。眼裏無筋。皮下無血底。別聽處分。豎起拂子云。今日則有。明日則無。

上堂。靈雲三十年。只道得箇不疑。未曾識桃花面在。玄沙道。諦當甚諦常。敢保老兄未徹。猶是扶醉度橋。只如汾陽纔聞得不覺笑哈哈。又作麼生。路入桃源深更深。

上堂。事同一家。萬別千差。雲門餠餅。趙州喫茶。擲下拄杖云。何似南山鱉鼻蛇。

上堂。舉真淨上堂云。頭陀石被莓苔裹。擲筆峰遭薜荔纏。羅漢寺裏。一年度三箇行者。歸宗參退喫茶。

師云。如來禪祖師禪則不問。且道生薑因甚不改辣。

上堂。未舉先知。未言先領。趙州無關。玄沙有嶺。卓拄杖云。萬別千差一印定。

佛生日上堂。舉釋迦老子指天指地云。天上天下惟我獨尊。雲門云。我當時若見。一棒打殺與狗子喫。貴圖天下太平。

師云。釋迦老子末上作無上無畏大獅子吼。分明平地干戈。雲門雖盡輸義膽忠肝。貴圖太平。轉見撥亂乾坤。羅漢當時若見。即向道。低聲低聲。且道據箇什麼道理。堯舜之君。猶有化在。

上堂。五月五日。天中節。衲僧喝似雷奔。棒如雨點。孤峰頂上呵罵自如。喚什麼作赤口白舌。逢佛殺佛。逢祖殺祖。逢羅漢殺羅漢。喚什麼作惡氣邪妖。拈拄杖云。這一道靈符。不從人得。正恁麼時。還我獅子兒來。

發洪上堂。卒風暴雨。鼓蕩無前。石裂崖崩。回避不及。總教喪盡生涯。方見時清道泰。拈拄杖云。功不浪施。

中秋上堂。秋雨淒淒。秋雲黯黯。豎起拄杖云。還見麼。修成八萬四千斧。不比尋常三五圓。



九月半上堂。日卓午夜半子。千門萬戶俱開。一聲兩聲砧杵。流沙浪闊。葱嶺無路。達磨何曾歸去。  
十一月旦。上堂。大地皆凍鎖。遍界熱如火。時節不放過。衲僧多蹉過。不蹉過。深雪之中有一箇。喝一喝。  
謝監收上堂。伶俐衲僧。動無思筭。合水和泥。田頭地畔。搆得完全。只得一半。既是搆得完全。為什麼只得一半。窮坑難滿。  
至節上堂。柳[木\*栗]木卷而曲。回天關轉地軸。群陰時時剝盡。一陽日日來復。為甚羅漢山中冷門難向。不是苦心人不知。  
聖節上堂。夫說法者。當如法說。今晨啟建 天基聖節。林下片心盡忠盡節。如法而說。見前大眾。同此片心。諦聽諦聽。起身云。聖躬萬歲。  
臘八上堂。全身坐在正覺山中。要行便行。要用便用。明星現處路頭通。十倍慈悲成脫空。  
元正上堂。舊歲昨宵去。新年今日來。燈籠與露柱。不覺笑哈哈。且道笑箇什麼。達磨面壁。雲門念七。

### 臨安府臨平山佛日淨慧禪寺語錄

參學

編

指三門云。我此一門。全無肯路。寶階三道。曲為今時。喝一喝云。退後退後。  
佛殿。黃面老子性命。今日落在朋上座手裏。扶起放倒。不為差事。  
踞方丈。萬仞崖頭。電光影裏。便教同死同生。更向別峰相見。陞座。祝 聖罷。(問答不錄)乃云。大機大用。全提半提。把住放行。有賓有主。總是開張鋪席。豁浪門堂。自遠趨風。先供死款。影沉寒水。借地活埋。於本參中。未有買賣分在。聊順時宜。分明舉似。五月臨平山下路。藕花無數滿汀洲 舉當山開山佛日和尚在夾山。一日普請次。維那命佛日送茶。日云。某甲祇為佛法來。不為送茶來。那云。和尚令請上座。日云。和尚即得。乃將茶去作務處。撼茶椀作聲。山不顧。日云。釀茶三五盃。意在鑊頭邊。山云。瓶有傾茶勢。籃中幾箇甌。日云。瓶有傾茶勢。籃中無一甌。便傾茶行。時大眾舉目視之。日云。大眾鶴望。乞師一言。山云。路逢死蛇莫打殺。無底籃子盛將歸。日云。手執夜明符。幾箇知天曉。山召大眾云。有人也。歸去來歸去來。  
師云。和尚即得。鑊頭邊事。已屬佛日。普請有人。摘茶翻成不了。雖然夾山眼目精明。知佛日自雲居來。不作王小波草鞋。看

顧。

上堂。諸佛出世。借水獻花。祖師西來。就模脫擊。一大藏教。考下文章。明眼衲僧。扶籬摸壁。到箇裏又作麼生。但願今年蚕麥熟。羅睺羅兒與一文。

正旦上堂。達磨西來。卦文不識。胡卜亂卜。傳至今日。佛日等是開箇鋪席。敢向朕兆未分已前。卓拄杖云。端平元年正月一。

上堂。千尺絲綸直下垂。一波纔動萬波隨。拈拄杖云。是汝諸人。作麼生吞吐。靠拄杖云。喫粥喫飯。有什麼難。喝一喝。

上堂。桃花爛熳紅。靈雲眼中血。不是斷腸人。此恨向誰說。

佛生日上堂。胞胎才出播殃塵。直至如今毒害人。一杓蘭湯無限恨。腕頭何止重千斤。

上堂。禁足安居。一句直舉。匝地普天。四月十五。

上堂。一葉落天下秋。回避不及底。眼睛突出。窺覷無門底。南州北州。有來由處沒來由。

十月旦上堂。時節若至。其理自彰。所以水至冬則始冰。地至冬則始凍。萬物至冬則成實。衲僧至冬又且如何。近火先焦。

上堂。冬不寒臆後看。酸風刮地。凍破泥團。毗盧樓閣前。少林深雪裏。誰知猶隔萬重關。喝一喝。

上堂。滯貨無價。爛錢無索。咬定牙關。將錯就錯。天將以夫子為木鐸。喝一喝。

謝兩班上堂。提折脚鐺。各出隻手。釋迦不先。彌勒不後。妙用臨機。如盤珠走。鼓腹笑復歌。面南看北斗。

上堂。舉老宿云。祖師九年面壁。為訪知音。若與麼會。將來喫鐵棒有日在。一老宿云。祖師九年面壁。何不慚惶。若與麼會。更置草鞋錢。行脚三十年。

師云。二老宿。與麼道。大似打開祖師門戶。截斷來者蹊徑。既不與麼。畢竟如何。達磨面壁。

佛成道上堂。六載將身草裏埋。當時有眼幾曾開。果然見得明星現。未到門庭冷似灰。

## 慶元府大梅山保福禪寺語錄

參學

編

佛殿。坐底坐殺。立底立殺。不知誰是赤鬚胡。轉身句子活鱗鱗。拈帖。我王庫內。無如是刀。提起云。快便難逢。全殺全活。維那但與麼拈出。

陞座。祝 聖罷。(問答不錄)乃云。從上已來。無上妙味。為世所珍。只如花信風未來已前。因甚盡大地人。望梅林止渴。所以黃梅七百。摘葉尋枝。碓下三更。移窠打垛。以至大庾嶺頭。枝蔓上。重生枝蔓。你自非心非佛。我自即心即佛。無異半弄青黃。馬大師道。梅子熟也。徒勞醞釀。龐居士親曾驗過。大似口裏膠生。還我核子來。管取吐不出。以拂子擊禪床云。今日一齊百雜碎了也。便有不受陽和力。不假栽培底。總是生擘破。終不馨香。且如何得人境相稱去。良久云。名從寶鼎調羹得。曲入胡笳帶月吹。舉當山開山祖師。馬祖。遣僧至問訊云。住此山多少時。開山云。但見四山青又黃。僧云。得箇什麼道理。便住此山。開山云。我在江西馬大師處。得即心即佛之旨。便住此山。僧云。近日馬大師。佛法別了。開山云。如何別。僧云。非心非佛。開山云。任他非心非佛。我自即心即佛。僧回江西。白馬大師。大師云。梅子熟也。師云。這僧用盡神力。只圖轉換大梅。殊不知。被大梅不動絲毫。和馬大師。一時轉却。

上堂。開口道著。則千句萬句朝宗。舉步踏著。則千門萬戶俱到。諸人道不著。只被舌頭擬。踏不著。只被腳頭礙。且道如何去却礙。良久云露。

上堂。深山巖崖。石頭大底大。小底小。保福山中。前崗後壠。前谿後澗。石頭大小。諸人一見便知。且道如何是佛法。若也會去。便見左之右之。拍拍是令。若也不會。且被石頭礙塞。

元宵上堂。節屆元宵氣象新。笙歌競奏漢宮春。滿城燈火喧和氣。車馬往來人看人。一處融通。千處萬處。重重無盡。皆吾心印發光。一處不透。盡向燈影重顛倒。擬欲眼睛定動。古佛燈明過去久矣。

謝定慧上堂。從上諸祖。受用不盡。一著子。尋常未曾容易。啟此緘封。茲承定慧老叔祖尊臨。盡情拈出。供養去也。卓拄杖云。河出崑崙。

涅槃上堂。四十九年蹲坐處。無明荒草幾多愁。一朝得意春風裏。活却從前死路頭。

上堂。黃檗棒頭。馬祖喝下。家家春風二三月。處處綠楊堪繫馬。拈拄杖云。拄杖子同條。生死不同條。卓拄杖云。錢是足陌。物是定價。

清明上堂。諸佛出世。標拍荒郊。達磨西來。塚添新土。保福今日。向拜掃無門處。打開一路。卓拄杖云。冬至寒食一百五。三月旦上堂。暮春初修禊事。少長咸集。群賢畢至。數樹松花。一溪流水。知慚愧底。足以暢敘幽情。無摸索底。正好頓張意氣。莫有把手登崇山峻嶺者麼。喝一喝云。且緩緩。

佛生日上堂。雨過前谿綠漲新。拈拄杖云。大梅杓柄轉精神。復靠拄杖云。放過一著。且向佛殿裏。各出隻手。

五月一上堂。不見一法即如來。是即名為觀自在。又道。不見一法。為大過患。以拂子擊禪床云。山河大地。一時擊碎了也。設有向轉身吐氣處。道得一句。大梅山中。猶有黃梅雨在。喝一喝。端午上堂。不捨諸道法。而現凡夫事。豎起拂子云。萬人遊仰處。高掛錦標。千波競起時。要須好手。不見道。還如曾鬪快龍舟。一度贏來方始休。

聖井請龍上堂。乾坤把定。稼穡焦熬。拈拄杖云。即今四大海水。在諸人頂門上。大身龍王。在諸人眼睛裏。卓拄杖云。興雲吐霧。為雨為霖。其或不覺不知。直須親到龍潭始得。

中夏上堂。古者道。行脚人十二時中。也要管帶些子始得。豈可只與麼。隨行逐隊。虛生浪死。今夏九十日。已過半了也。諸人十二時中。又作麼生。喫粥喫飯行住坐臥。還曾見得親切麼。咄。

上堂。佛祖說不到處。道得一句。綴骨粘皮。行不到處。進得一步。撞牆撞壁。未開口時道著。未舉步時踏看。荊棘參天。葛藤遍地。只為諸人不肯。盡情放下。拄杖子今日。勸諸人放下去。卓拄杖。下座。

上堂。動絃別曲。落葉知秋。普天匝地。騎牛覓牛。水潦和尚被馬師一踏。便道。識得百千三昧。無量妙義。根源於一毫頭。直至如今笑不休。

上堂。釋迦已去。彌勒未生。正當今日。拄杖子向大梅峰頂。與諸人舉揚自恣佛事。卓拄杖云。若到諸方。不得錯舉。

謝首座維那上堂。摩訶衍法。離四句絕百非。仰山居第二座所說之法。且道第一座。所說何法。不具睦州指臨濟喫棒底眼目。難以窺其涯涘。若無興化打克賓。罰錢出院底機用。但知子承父業。昧却源流。諸人要知第一座所說法麼。俱。

中秋上堂。心月孤圓。光吞萬像。起模畫樣。光非照境。境亦非存。收拾不上。光境俱亡。復是何物。切忌向這裏蹲坐。

上堂。得力句子。全身擔荷。水長船高。泥多佛大。西風鴈字新。東籬菊花老。四十九年談不到。

重陽上堂。行路難。有何難。不見陶洲明採菊東籬下。悠然見南山。喝一喝云。彼此丈夫。莫受人瞞。

上堂。多言喪道。多歧亡羊。渾無顆粒。別甌炊香。拍禪床云。驚起暮天沙上鴈。海門斜去兩三行。

天基節上堂。一國之中。聖主最尊。四民之中。君恩最重。衲僧居四民之外。正當今日。如何報恩。豎拂子云。萬年松頂拂雲高。



佛成道上堂。錯步入雪山。茫茫謾尋討。鬼眼忽撐開。草窠裏蹲坐。見底是明星。悟底是什麼。瞿曇瞿曇。未敢相保。因事上堂。天寒人寒徹骨。迥無依倚。拳到踢到當機。貴得崢嶸。眼裏無筋。韓獺逐塊。皮下有血。杓卜虛聲。儻或不然。有寒暑兮促君壽。有鬼神兮妬君福。

上堂。凍雲垂野。掠地衝風。乾坤把定。凡聖潛蹤。堪笑神光曾斷臂。至今埋在雪堆中。

上堂。向上機。活人句。石火電光。葛藤露布。靈蹤更在猿啼處。

上堂。塵劫事。只如今。卓拄杖云。向這裏瓦解冰銷。如水入水。似金博金。未知年窮歲盡在。何故。三年一閏。

謝兩班上堂。大無外。細無內。斗換星移。明珠絕類。權實不到處。賓主歷然時。佛祖無門著眼窺。

上堂。塵劫至今。堂堂丈夫。無毫髮許。蓋覆得渠。覓之轉失。親之轉踈。不論聖凡。說甚賢愚。直饒放下屠刀。衲僧門下。未敢相許。

七夕上堂。分明見徹。開口猶難。驀過重關。轉身無路。只這拙處。作麼生去。豎拂子云。不得有語。不得無語。擲下拂子云。發機須是千鈞弩。

上堂。履踐平實道路。倚門傍戶。敲磕嶮峻門庭。接響承虛。無師智自然智。推倒大梅峰。一舉九萬里。保福緩緩向道。伏惟安置。脾寒上堂。古者道。學道人。身心不猛烈。工夫有間斷。如隔日瘧相似。每日寒一番熱一番。驢年得絕後再甦。到大安樂田地。山僧看來。一日十二時。無一人一時一刻。向裏面覷捕。能似發脾寒一番亦得。何故。正寒戰時。捏定雙拳。咬定牙關。佛也不識。正熱極時。口中火發。身如山重。忽然大汗一回。卓拄杖云。也欠這一服藥不得。

上堂。凡聖情盡。進步竿頭。只肯洛浦灌溪。不肯德山臨濟。且道。獅子遊行一句。作麼生道。天寒歸堂向火。

## 慶元府香山孝慈真應禪寺語錄

參學

編

指三門云。東開西閉。滯在門庭。左出右入。重添途轍。新香山有條活路。與諸人共行去也。喝一喝。

佛殿。禮自己佛。燒自己香。容顏甚奇妙。光明照十方。

拈帖。從上佛祖。盡向此大光明藏中發現。且道。此大光明。從什麼處起。塞却耳根。分明聽取。

陞座。祝 聖罷。僧問。談玄說妙。畫餅充飢。舉古論今。蒸砂作飯。去此二途。如何通信。師云。白蘋紅蓼正秋風。進云。向這裏。便知落處時如何。師云。潼關猶可度。劔閣路難行。進云。如何是劔閣路。師云。無你著脚處。進云。記得百丈大智禪師。參馬祖侍立次。祖以目視禪床角拂子時如何。師云。與賊過梯。進云。百丈云。即此用離此用。師云。一釣便上。進云。馬祖云。你向後開兩片皮。如何為人。百丈取拂子豎起。師云。畫得真如活。進云。馬祖云。即此用離此用。百丈掛拂舊處。師云。相隨來也。進云。馬祖震威一喝。直得三日耳聾。師云。頭正尾正。僧禮拜。師乃云。向上一路。帶水拖泥。向下文長。牽枝引蔓。面前案山子。時時生層雲。時時動天籟。不是心。不是佛。不是物。以拂子劃一劃云。若不得流水。還應過別山。舉適來禪客問百丈再參馬祖公案。師云。雷聲不迅怒。不足以起蒼龍之勢。機弄不深密。不足以陷猛虎之暴。汾陽云。悟去便休。說甚三日耳聾。著語云。秤尾尋星。石門云。若不三日耳聾。何得悟去。著語云。斤中定兩。且問諸人。三日耳聾。與悟去相去多少。

小參。佛佛授受。祖祖相傳。穿眾穴於一毫。握秤尺於掌內。金翅擘海。怒雷破山。拈拄杖云。我與你同條生。不與你同條死。登山須到頂。入海須到底。溟鵬九萬。遼鶴三千。須知海嶽歸明主。未必乾坤陷吉人。

復舉黃山到夾山。山問。甚處人。黃山云。閩中人。夾山云。還識老僧麼。黃云。還識學人麼。夾山云。此事且止。你還我草鞋價。我却還你江陵米價。黃山云。江陵米作麼價。夾山云。真獅子兒。善獅子吼。

師云。黃山借便開門。轉身無路。夾山辯問詳審。禮但周遮。當時待問江陵米作麼價。拈棒便打。

上堂。坐深井者。不知太虛之寬廣。亡偏見者。方知至理之圓融。德山載疏鈔南來。氣宇如王。龍潭山中爇却則不問。因甚見僧入門便棒。人貧智短。

上堂。舉洞山問青林。近離甚處。林云武林。洞云。武林法道。何似此間。林云。胡地冬抽筍。洞云。別甌炊香供養。林便出去。洞山云。此子向後走殺天下人去。

師云。辨金別玉。還他眼目精明。青林直饒不受別甌炊香供養。也遭他兩杓惡水。

重陽上堂。老僧軒前黃菊花。不可勝數如恒沙。誰在畫樓沽酒處。相邀來喫趙州茶。

臘八上堂。雪山六載。自欺瞞。耿耿明星碧漢間。開眼更無回避處。普天匝地黑漫漫。古今日月。古今星辰。豎拂子云。還見麼。

良久云。若教頻下淚。滄海也須乾。  
上堂。舉九峯示眾云。常住法身。不生不滅。僧便問。既是不生不滅。為什麼六道輪迴。峯云。為有心故。僧云。以何方便。當證法身。峯云。以虛空心。合虛空理。僧云。證後如何。峯云。任從三界轉。徒聽四生奔。復云。會麼。僧云不會。峯云。禮拜著。師云。九峯大似會作楷法。點畫一一分明。及乎這僧道箇不會。却又拈出草書。雖然。胷中無草書。難看羲獻帖。

## 婺州雲黃山寶林禪寺語錄

侍者 宗坦 延輝 編

指三門云。此大樓閣。無住無去。此樓閣門。無開無閉。作者同歸。不勞彈指。  
彌勒殿。七佛前引。維摩後隨。但知逐隊隨邪。脚跟何曾點地。展坐具云。看看。盖地盖天。流通去也。  
拈帖。一見便見。一得永得。當陽拈出。雷動風行。  
山門疏。離四句絕百非。聽取第一義諦。  
指法座。行到說不到。漏雨漏風。說到行不到。撞牆撞壁。行說俱到時如何。向上有事在。  
陞座。祝 聖罷。(問答不錄)乃云。擊門槌。拊案尺。遍界刀鏘。參天荆棘。與麼與麼。爐鞴之所。不與麼不與麼。佛手難遮。總不與麼時如何。毗婆尸佛早留心。直至如今不得妙。舉雪竇明覺禪師示眾云。山河無隔礙。光明處處透。傅大士騎驢入你鼻孔裏。見諸人不惺惺。却歸雙林寺去也。便下座。  
師云。雪竇與麼說話。要瞞諸人則易。埋沒諸人則難。何故。出門見山水。入門見佛殿。  
上堂。舉傅大士帶道冠儒履袈裟。見梁武帝。帝問云。僧耶。士指冠。帝云道耶。士指履。帝云俗耶。士指袈裟。汾陽云。大士多能。五祖戒云。傍觀者醜。  
師云。武帝高懸聖鑑。要見緇素分明。大士覲面當機。且非索鹽奉馬。檢點將來。只知賣貴。不知賣賤。可惜。武帝當時放過。隨後好與一撈。非僧非道非俗。又指箇什麼。管取口乾舌大。  
上堂。一不得向。二不得討。廊下閑行。堂中打坐。眼裏耳裏。觀世音胡達磨。拍禪床云。過。  
結夏上堂。握驪頷明珠。乘金剛寶劍。日日禁足安居。箇箇心空及第。猶是衲僧尋常行履。雙林乍入院來。不敢背俗違時。下座且與諸人。普同作禮。

善慧大士生日。上堂。悲願海。四生海。出沒卷舒。圓融自在。拈拄杖云。善慧大士來也。石火電光。且過一邊。擬欲擡眸。龍華會裏。靠拄杖下座。

上堂。聖制禁足安居。山僧月餘在外。驀嶺沿山。穿畦透陌。才通大道。又入深村。要過那邊。截流不顧。雖然不遵聖制。却有知音。且道。誰是知音。南無心王菩薩。

上堂。(因堂中失賊)半夜三更。天昏地黑。赤肉團邊。捉得箇賊。正好朝打三千。暮打八百。忽然向白拈手裏。分贓時如何。賊賊。

上堂。舉傅大士云。夜夜抱佛眠。朝朝還共起。起坐鎮相隨。語默同居止。纖毫不相離。如身影相似。欲識佛去處。只這語聲是。玄沙云。大小傅大士。只認得箇昭昭靈靈。雪竇云。玄沙也是打草驚蛇。

師云。大士放行。故是七穿八穴。從汝針筍。大士把住。又向甚處著眼。良久云。且待下生。

中夏上堂。天得中星辰羅。地得中陰陽和。衲僧得中罷却干戈。隨寒逐暑。徒自波波。一夏九十日。今日是中夏。諸人未舉先和。因甚問著如何是汝心。却又不會。拈拄杖云。拄杖子到此。也不得無過。是汝諸人。還知痛痒麼。喝一喝。

上堂。聖制安居處。凡夫路不同。拈拄杖云。過去不可得。現在不可得。未來不可得。掀翻毗盧樓閣。只在頃刻。天上無彌勒。地下無彌勒。

上堂。盡乾坤大地。微塵諸佛。向拄杖頭。爭佛法。覓勝負云。雲門大師自啟封疆。拄杖子。與彌勒釋迦鬪打去也。琅琊和尚。大似把主人公不定。拈拄杖云。這箇是拄杖子。那箇是微塵諸佛。彌勒釋迦。卓拄杖云。裂破。

八月旦上堂。招手橫趨而過。捧上安得成龍。當陽吹起布毛。錯認橘皮作火。秋風一陣來。落葉兩三片。漿水錢草鞋錢。迫不得已。與諸人還了也。西竺乾東震旦。人人脚底長安道。喝一喝。

上堂。在有破有。居空破空。二幻既除。中道不立。衲僧家。緊峭草鞋。到這裏忽然轉身吐氣時如何。到江吳地盡。隔岸越山多。

上堂。一切障礙。即究竟覺。山河大地。日月星辰。萬像森羅。明暗色空。有甚障礙處。行住坐臥。瞬目揚眉。開單展鉢。折旋俯仰。有甚障礙處。究竟又究竟箇甚麼。覺又覺箇甚麼。一切智智清淨。無二無二分。無別無斷故。釋迦老子。好與三十拄杖。

謝兩班上堂。老木成喬林。秋空見明月。芥子之中入正定。須彌山中從定出。過去佛。現在佛。未來佛。無物堪比倫。教我如何說。

上堂。靈龜未兆之際。黑荳未芽已前。道得一句。盖地盖天。猶未是無師句自然句。秋風高。秋空闊。雪峰何曾桶底脫。



上堂。無佛無眾生無古今。拍禪床左邊云。過這邊著。無修無證無為。拍禪床右邊云。過這邊著。豎拂子云。會麼。良久云。渾崙壁不破。與你兩文錢。

佛成道上堂。天上星。夜夜現。眼豁開。方始見。黃面瞿曇。腦後拔箭。

上堂。諸佛及眾生。皆承此恩力。衲僧家。拄杖頭。帶了一升三合。要行便行。要坐便坐。又承什麼恩力。良久云。喫粥喫飯。

上堂。寒時寒殺。熱時熱殺。諸方普請。寒暄。雙林寒時熱殺。熱時寒殺。且非別換條貫。何故。大士從來頭戴冠。

上堂。三界無安。猶如火宅。良醫之門。愈多病人。傅大士打失鼻孔眼睛。至今尋討不見。胡相公偏要向高高峰頂起殿。不管鹽貴米賤。春風一陣來。花開三五片。達磨大師挨拶不入。忽携隻履返西天。喝一喝。

上堂。此方真教體。清淨在音聞。眼裏耳裏。了沒交涉。觀音菩薩三十拄杖。貶向鐵圍那畔。是真精進。是名真法供養如來。

上堂。一處通。千處萬處絕羅籠。青山常在。知識難逢。威音王已前。猶是坐家致仕。衲僧氣宇如王。有何憑據。良久云。滄山笠子。誌公拄杖。

上堂。觸境無滯。舉目全乖。田地穩密。轉身無路。且道遍恒河沙。隱顯無間。一句作麼生。良久云。住持事繁。果然忘却。

上堂。彌勒真彌勒。拈拄杖云。是真是假。還有道得底麼。如無。莫道山僧瞞汝諸人去也。以拄杖橫肩云。天上無天下無。

上堂。大海一漚未發已前。以拂子劃一劃云。坤六段乾三連。擬欲眨眼。驢年驢年。

佛涅槃。并妙光菩薩生日。上堂。雙林樹下生。雙林樹下滅。生死不相關。彼此是途轍。雖然。擲示雙趺則不問。諸人且道。妙光菩薩。因甚姓劉。喝一喝。

上堂。正旦令晨。物物咸新。衲僧應時納祐。不是和光同塵。柏樹子。麻三斤。死柴頭上放陽春。

上堂。一冬晴煖。梅花盡開。林下道人。折得一蓓兩蓓。但見清香可愛。不知結調羹子未得。何故。猶有雪在。

上堂。寂然不動。感而遂通。癩馬繫枯椿。寂而常動。不感而通。四方八面絕羅籠。不下禪床。一喝耳聾。不妨遊戲人事海中。

上堂。一切聲是佛聲。一切色是佛色。三分光陰二早過。普天匝地逐春忙。辜負春光。腸斷春光。杏園啼百舌。誰醉在花傍。

上堂。橫按拄杖云。久雨不妨農。卓拄杖一下云。春晴多賞翫。不與法縛。不求法脫。不敬持戒。不憎毀禁。不重久習。不輕初學。

是處井中有水。誰家竈裏無煙。雖然。乍可移山。不可改性。擲下拄杖云。又輓入泥水去也。

四月旦上堂。不歷化城。踏翻寶所。猶是途路之樂。是汝諸人。拗折拄杖。高掛鉢囊。還端的也無。須知三條椽下。不是你諸人安身處。長連床上。不是你諸人喫粥喫飯處。平地上不是你諸人經行處。東司裏不是你諸人大小二事處。拈拄杖云。拄杖子。不覺手舞足蹈。出來道。卓拄杖云。安居近也。

上堂。今古兩忘。聖凡路絕。猶在荊棘林中。黃金殿上。相逢者少。地獄天堂。隨處作主去也。卓拄杖云。高也著。低也著。

端午上堂。拈拄杖云。是藥非藥。信手拈來。殺人活人。風生八極。任是文殊維摩。卓拄杖云。也少這一服不得。

善慧大士生日上堂。兜率宮中把不定。松山山裏借場開。普天匝地皆泥水。那更當生補處來。莫有把定封疆者麼。如無。以拂子擊禪床云。大士講經竟。

上堂。拈拄杖云。內視於心。心無其心。外視於形。形無其形。遠視於物。物無其物。雙林記得。兒時上學。忽一日調得四聲。不覺懽喜。便道。我會也我會也。且道。致君澤民。銘勳彝鼎。相去多少。

解制上堂。盡力道不得底句。不在江南。便在江北。衲僧布袋頭開。拄杖未拈。草鞋未穿。已遊遍四大部洲了也。作麼生道得。如無。雙林自道去也。以手作策眉勢云。是多少。

上堂。拈拄杖云。若向這裏。領略得去。動靜一如。彼此無間。自能全動全靜。全去全住。其或不然。拈動拄杖草鞋。便是銀山鐵壁。

上堂。頭頂天。腳踏地。聞鼓聲上來。減多少意氣。他殺不如自殺。參他不如參己。森羅萬像。是汝諸人知識。森羅萬像。是汝諸人自己。堪笑嵩山破竈墮。既是泥土合成。又要破也墮也。作什麼。拈拄杖卓云。起。

開爐上堂。金圈栗蓬。爐鞴鎔鎔。吞得透得。鈍鐵頑銅。百丈徒誇三日聾。

達磨忌上堂。分皮分髓誑盲聾。污却嵩山熊耳峰。隻履携歸葱嶺去。賊身何處不相逢。

上堂。透脫言詮。鐵山橫臥。截斷言詮。通塗荒草。良久云。自小持齋今已老。

上堂。二由一有。一亦莫守。一陽生也。向脫窠臼絕羅籠處。道將一句來。

上堂。鶯老花殘。春事已過。明眼衲僧。多是蹉過。棟花信風。不肯放過。萬戶千門。一時俱過。築著磕著。是誰之過。轉換不得。

也要驗過。拍禪床云。過。

佛生日上堂。杓柄人人入手來。莫隨顛倒自沉埋。普天匝地無回互。黃面瞿曇出母胎。便與麼去。也少這一杓惡水不得。卓拄杖一下。下座。

上堂。九日無白醪。飽餐黃栗糕。孤峰絕頂。兩眼彌高。不覺不知。忽然帽落。秋風惡。秋風惡。

上堂。碌碌復碌碌。良馬白日足。咬定牙關。掀翻地軸。神不敢呵。鬼不敢哭。世尊入地獄。調達出地獄。

上堂。惟一豎密身。一切塵中現。因什麼。葉落方乃知秋。人人皮下有血。穿却鼻孔。換却眼睛。不覺不知。喝一喝。

上堂。一見便見。何勞[言\*空]搭。將軍不上便橋。勇士不在掛甲。又說甚寒山子水牯牛。今日四。明日八。僧問巖頭。路逢猛虎時如何。拶。

謝兩班諸庫監收上堂。建立諸法無諸法。即是真如無上真如。自然世出世間。於法自在。左天親右無著。南天台北五臺。厨庫僧堂。三門佛殿。豎四橫三。玲瓏八面。賓主交參。同說是法。梵音清雅。令人樂聞。風以時。雨以時。禾登場。穀滿倉。擊壤歌歌。共樂無為。拈拄杖云。且道。拄杖子又作麼生。能為萬象主。不逐四時彫。

謝橫頭副寺上堂。入無窮。出無盡。把定要津。頭正尾正。且道。以何為驗。一二三四。縱橫十字。

辭寶林赴平江府承天上堂。萬里谿山。一天明月。拄杖頭邊。無欠無餘。無彼無此。拈拄杖。下座云。還我東行西行。

## 平江府承天能仁禪寺語錄

侍者 淨球 智瑾 編

佛殿。提起坐具云。収則大地全収。展則大千俱覆。黃面瞿曇。隱身無路。

踞方丈。千聖頂[寧\*頁]打開。三塗地底把住。是汝諸人鼻孔。總在山僧手裏。卓拄杖云。一時穿却。

省筍。金剛圈。栗棘蓬。識得衲僧公驗。便是造化爐中。

府疏。赤水求珠。猶是人間之寶。和雲唱出。故非格外玄談。只這些兒。如何領會。不二門頭。好生薦取。

山門疏。前峨嵋峰。後碧玉盤。一字字。一句句。且非草本相瞞。指法座。坐斷毗盧頂。不稟釋迦文。喝一喝。且在下風。

陞座。祝 聖罷。(問答不錄)乃云。水天空闊。鬧市門開。南來北來。拈却門前下馬臺。千門萬戶。總是如來經行處。衲僧家。莽莽鹵鹵。無規無矩。甜瓜徹蒂甜。苦瓠連根苦。畢竟如何。良久云。一枕拱北。萬折朝東。舉明覺赴雪竇。到承天。僧問祖意西來則不問。北斗藏身事若何。竇云。拈頭作尾漢。僧云。請師答話。竇云。西天令嚴。

師云。雪竇頭上錐。脚下筇。拍拍是令。成就一切世界。要識這僧麼。葉公畫龍。

小參。拈拄杖云。全機大用。毫髮不存。臨濟一味驅奴。德山一味使婢。芭蕉全機與奪。虛築防胡萬里城。雲門忍俊不禁。拋向雪峰大張口。山僧無拒風力。不敢効虎驟龍驤。橫拈倒用。自從游歷。以至近離雙林。度嶺經沙。東撐西拄。全得渠力。及過江來。洗脚上船。不動步而到此。將謂拄杖子。可以靠壁。三通鼓罷。大眾雲臻。況言無味。語無味。法無味。仍煩拄杖子。打箇小座。卓拄杖云。雖然如是。終有不滿意處。何故。薄禮致怨。舉神鼎和尚開堂。示眾云。山僧行脚。也無正因。只待向東京城裏。聽一本經論於古寺閑房。且恁麼過時。不謂行到汝州。被一陣業風。吹上首山。曲条木床。見箇老和尚。當時把不住。禮却他三拜。直至如今悔不得。

師云神鼎開眼失脚。落首山陷穽。大似啞子喫苦瓜。當時既禮他三拜。又悔箇什麼。山僧嘉定初。亦無正因。行脚一味。江湖中打沒交涉。太白峰前。被箇老和尚。於沒交涉處。一拳打破乞兒窠窟。直至如今。轉沒交涉。

謝專使留兩班上堂。彌勒兜率天宮所說之法。乃至下生補處。一一仍舊而說。更無少異。且道。據箇什麼。便乃如此。拈拄杖云。使乎使乎。不辱命。

謝維那。莊主。道舊。上堂。興化打克賓。種穀不生荳。雖然費栽培。也要人知有。興化棒。承天不是無不是。不解拈出。既遇山中人。且說山中話。

雪下上堂。直得動地雨花。爭如歸堂向火。雪竇大似閉門覓活。盡乾坤大地。把定無汝轉側處。啞。打破蔡州城了也。

上堂。懸崖撒手。藉草眠雲。四方八面。移南作北。佛祖不歷處。古今不到處。如何行履。三九二十七。籬頭吹鬻栗。

藹八上堂。開半夜眼。見半夜星。普天匝地。誰不與麼。黃面老瞿曇。所成者何道。參。

謝寮元上堂。旃檀林。獅子窟。蹲坐不得處。正好翻身。片片煙消時。方堪拈出。不是心。不是佛。明眼衲僧莫輕忽。



上堂。吳宮煙冷水迢迢。當日齊腰雪未消。臘月今朝二十五。今朝未是拜年朝。

上堂。歲之元。月之元。日之元。元正啟祚。萬彙發生。達磨西來。直指人心。見性成佛。一花開五葉。結果自然成。兩段不同。收歸上科。

謝兩班上堂。坐一走七。橫三豎四。大力量人。全身擔負。且道。擔負箇什麼。普化鈴鐸。楊岐驢子。

元宵上堂。自古及今。燈燈相續。匝地普天。燈燈無間。助發實相義。今朝正月半。

上堂。聞聲悟道。左邊卓拄杖云。觀音菩薩過這邊著。見色明心。右邊卓拄杖云。文殊菩薩過這邊著。不動步而登寶所。中間卓拄杖。普賢菩薩脚跟下。好與一錘。諸人要知承天落處麼。搖頭說易當朝客。落手圍碁對俗人。

天童卞山和尚遺書至。上堂。卷舒出沒。生死海中。石火莫及。電光罔追。承天手足情鍾。今日重為卞山和尚。灑此兩行淚。與麼見得。便知天下人。不奈此老何。

涅槃上堂。末上稱尊。謾生跨赤土。摩胸告眾。抵死亞私商。與麼生。與麼死。花鳥年年笑不休。衲僧自有黃金骨。

靈隱菴藏主至上堂。當年一曲脫空歌。急水灘頭鳥作窠。知是翻騰經幾手。沒諛訛處有諛訛。承天今日看來。有甚諛訛處。言言見諦。句句朝宗。南山起雲。北山下雨。總是破草鞋。春寒料峭。伏惟藏主尊候萬福。

上堂。寒則普天寒。熱則普天熱。透出寒暑關。何曾離窠窟。因思熱則取涼。寒燒檟柁。無端被人喚。作趙州古佛。

謝山藏主達維那上堂。威音王已前。無師自悟。是第二句。一大藏教。詮註不及。十聲槌下。敲打不出。顧視左右云。第一句響。

開且過上堂。木落千巖。秋空如洗。向這裏。轉得身去。可以移星換斗。轉位回機。百尺竿頭。纖塵不立。向這裏進得一步。殺活縱擒。縱橫自在。須彌無頂。滄海無底。靠拄杖云。承天有茶有湯。

謝慧日上堂。迦葉三昧。阿難不知。聞名見面。劒去久矣。拽擺拖犁。較後先。楊岐鼻孔沒半邊。

中秋上堂。人人自有光明在。看時不見暗昏昏。拈拄杖云。這箇豈不是光明。敲香臺云。一一聞見分明。喚什麼作暗。三年大比鷓鴣橫秋。橫按拄杖云。且道是什麼題目。喝一喝。

開爐上堂。酸風刮地。猛烈寒威。火爐震動。禪床震動。未到火種全無。若是衲衣單薄。且請歸堂向火。

上堂。却物為上。逐物為下。壁底籬根。尋縫覓罅。信脚踏翻。大地平沉。即虛空體。證魔王身。擲拄杖云。元來却是南山鰲鼻。

上堂。正月之吉。始和。諸福之物畢至。衲僧家。說甚畢至。百草頭邊。罷却干戈。十字街頭。縱橫遊戲。鏡清智門佛法有無失利。總是抱橋柱澡洗。橫按拄杖云。見麼。江山行不盡。春雨下無時。上堂。雲門一曲。臘月二十五。今朝是臘月二十五。諸人自謂。衲僧門下客。且道如何是雲門一曲。若道不得。拄杖子却為你諸人驚懼。因甚如此。臘月三十日。只在目前。

散天基節。上堂。天地發祥。聖人誕降。恩霑四海。德被萬邦。林下道人。坐則禪板蒲團。用則拄杖拂子。無非仰答聖恩。今日讚祝一句。又作麼生。此心心外更無心。

謝副寺莊主寮元上堂。田庫兒。甚奇怪。一下鋤頭。打破土塊。盡大地老和尚。髑髏粉碎。坐一走七。圓融內外。青松下。明窗內。玉殿瓊樓。未為最。分毫定斤兩。涓滴見滄海。高聲云。拄杖子話在。靠拄杖下座。

元宵上堂。三轉法輪於大千。其輪本來常清淨。平江出燈道地。諸人盡知燈明如來。在諸人眼裏耳裏。轉如是輪。因甚不知。喝一喝。

上堂。如是我聞。遲日江山麗。春風花草香。諸佛出世。眼瞎耳聾。達磨西來。眼瞎耳聾。衲僧成團成塊。眼瞎耳聾。若是箇漢。向黑豈未生已前。信受奉行去。三十年後。方知。且道知箇什麼。眼瞎耳聾。

靈隱大川和尚遺書至。上堂。虛空迸綻。山嶽起舞。拔舌犁耕。罪惡俱露。拈拄杖云。承天更與三十痛棒。還知此棒落處麼。不敢辜負我迦葉師兄。

上堂。無邊刹境。自他不隔於毫端。十世古今。始終不離於當念。衲僧聞著便會。舉著便知。春風浩浩。春日遲遲。且道。西天那蘭陀寺裏。今日有幾人。打失鼻孔。若也不知。香臺代汝。喫棒去也。以拄杖擊香臺一下。下座。

妙峰會中道舊至。并鑄鍋。上堂。妙高峰頂。七日尋討不見。忽向別峰把手。大似生鐵鑄就。成就不可說不可說香積世界佛事。雖然行人更在青山外。

四月旦上堂。鐵鞭指處陣雲橫。脚力盡時山更好。那更獅子返擲。東西南北。初無定止。孟夏自孟夏。衲僧因什麼。盡向今日打住。良久云。爭怪得他。

謝秉拂。夏齋慧感夫人生日上堂。真靈無功。功超造化。真聖無相。相包虛空。從權攝化。正按旁提。風行草偃。玉轉珠回。使人人向這裏。飽食味法味。合掌云。慚愧。

上堂。買黑老婆。巖頭三文自何而得。空手來去。老胡行止未明。入水不動波。入林不動草。拈向一邊。只如虎口裏奪食。驪頰下抉

珠。又作麼生。官不容針。

保苗上堂。驅耕夫之牛。令他苗稼滋長。奪飢人之食。使箇箇飽齟齬地。且道。承天看經保苗。是同是別。若也道得。便可證如意輪三昧海。若道不得。辜負承天半夏。

上堂。看樓打樓。東湧西沒。入水入泥。穿皮透骨。十字街頭石敢當。忽會轉身句。便笑遼天鶻。達磨大師眼睛突。

上堂。大人境界。佛祖說之。莫窮。文殊證之。寂寂。普賢證之。重重。無邊身菩薩到此。無展神通處。承天向鬧市裏。拋碌磚去也。卓拄杖云。一葉落天下秋。

謝兩班上堂。無用之用。其用甚大。無功之功。其功甚博。自然如龍得水。似虎靠山。壺中春色異人間。

浙翁和尚忌拈香。盡無邊虛空。是徑山佛心禪師涅槃後相。盡無邊虛空。是承天法座。作麼生安排。作麼生供養。承天今日淚出痛腸。描畫虛空去也。拈起香云。還見麼。磬聲山色裏。一椀爛枯柴。

圓通中洲至。上堂。(嗣無準)爰從耳門圓照三昧。緣心自在。東倒西攔。異中現同。小中現大。只如不涉眼色耳聲。甚處與他相見。婺機羅。川紙會。

淨慈道舊至。上堂。伶俐衲僧。討甚巴鼻。著脚處寸草不生。著眼時佛祖掃地。且道。以何為據。不愛南山愛鰲鼻。

佛涅槃上堂。毗藍園裏。活中覓死不可得。雙林樹下。死中覓活不可得。腦後一錐。卓拄杖云。是活是死。靠拄杖下座。

上堂。南州北州。萬緒千頭。釣絲絞水。紙撚無油。鶴神飛上天。土宿騎黃牛。大海有十件奇特事。未曾說著。海底蓬塵起。千江水逆流。維摩丈室。有三萬二千獅子座。彈指一下云。収。

結夏上堂。放下身心。仁義禮智。黃面瞿曇撈天摸地。四月十五。喚作結制。東行不見西行利。

靈隱東谷和尚遺書至。上堂。正不立玄。偏無所附。三十年。異類中行。末後句。月圓古渡。且道東谷和尚。還有來去也無。夜船撥轉琉璃殿。白鳥飛宿無影樹。

謝耆舊置田上堂。實諸所無。自己田地永失主宰。空諸所有。本來契券總屬當人。寸土寸金。一粒萬粒。天牢神地牢神。合掌讚嘆云。南無為法檀度。大菩薩摩訶薩。

謝淨慈首座。并祈雨上堂。膚寸生層雲。已具瀾漫勢。盡矚晴空日。且非煙霧比。首座行脚。首座來也。落在第二。看看。且道看箇什麼。雲行雨至。

上堂。孤峰頂上。無出身路。十字街頭。亦無向背。臨濟老瞎禿。明州憨布袋。正令不行。東倒西攔。諸人若不放過。承天一著。眉

毛罽裏。與諸人無相見分。喝一喝。  
結夏。因事上堂。以拂子擊禪床云。前佛性命。後佛紀綱。一時打失了也。長期百二十日。且憑何而住。豎拂子云。有這箇在。  
退院上堂。平地起堆從古有。青天霹靂避猶難。杖頭自有通方眼。  
風月一天非等閑。

## 安吉州柏山崇恩資壽禪寺語錄

侍者 編

佛殿。木骨金粧。似則也似。瞬目揚眉。西天此土。  
據室。倒卓須彌。揭翻大海。魚龍變化。禽鳥懽呼。垂下一足云。  
且放佛祖出頭。  
府帖。若論此事。如王髻中珠。不妄與人。還是眼目精明。方知來處。  
府疏。世俗諦中。有真聖諦。便是河目海口。難盡宣揚。提起疏云。見麼。大王來也。  
指法座。象王行處。狐兔絕蹤。水月現時。風雲自異。驟步云。高著眼。  
祝 聖罷。就座云。四方洞達。萬派朝宗。一句截流。羣機寢削。莫有識得鈎頭意者麼。  
僧問。插草以建梵剎。賢于妙在當機。宗王特建精藍。和尚如何舉唱。師云。好生諦聽。進云。可謂驚群之句。遇驚群人舉揚。奇特之事。遇奇特人拈出。師云。逢人但恁麼舉。進云。即今亦不少。師云。還我驚群句來。進云。如何是驚群句。師云。迅雷不及掩耳。進云。如何是奇特事。師云。是故此處取吉祥。進云。記得世尊。於布髮掩泥處。獻花燃燈。是如何。師云。入水見長人。進云。燃燈指布髮處云。此一方地。宜建梵剎。又作麼生。師云。鈎頭有餌。進云。時眾中有賢于長者。持標於指處插云。建梵剎已竟。師云。波騰嶽立。進云。時諸天散花讚云。長者有大智慧。師云。讚嘆也讚嘆不及。進云。今日宗王建梵剎竟。和尚又如何讚嘆。師云。虛空可量風可繫。無能說此佛功德。進云。可謂今古應無墜。分明在目前。師云。頂門具眼好生觀。僧禮拜。  
師乃云。摩竭掩室。毗耶杜詞。依稀彷彿。似箇衲僧門下。及乎釋梵三請。文殊讚善。玉本無瑕。雕文喪德。誰知孤峯頂上。不是安身。墟市平田。如何措足。進一步。踏他王公草地。退一步。亦是少父丘園。當陽坐斷。八面風生。若是釋迦說不到處。淨名彈擊不得處。新柏山不是固其肩鑄謹其緘封。拍禪床云。王令已行 舉波



斯匿王問佛。聖義諦中。還有世俗諦否。若言其無。智不應二。若言其有。智不應一。一二之義。其義云何。佛云。大王於過去龍光佛法中。曾問此義。我今無說。汝今無聽。無說無聽。是名一義二義。師云。波斯匿王。具勘驗衲僧眼目。要見玉石分明。釋迦老子拈出木楔子。要移換人。不知自失一隻眼。且道。謊訛在什麼處。小參。大人具大見。摩醯正眼。豎亞頂門。大智發大機。於一毫端。現寶王刹。不與萬法為侶。不與千聖同途。一切殊勝事。由此圓成。無量三昧門。由此建立。全身擔荷。地厚天高。正令全提。山遙水遠。正與麼時如何。如王寶劍隨王意。似鏡當臺要絕觀。舉南泉和尚入院。知事頭首。請歸方丈。有僧便問。師居方丈。將何指示於人。泉云。昨夜三更失却牛。天明起來失却火。師云。南泉透脫泥水。迥絕蹊徑。向威音那畔。突出眼睛。新柏山雖則不知韶濩謔經之奏。元酒大羹之味。也要著一隻眼。南泉直饒道王老師不打這破鼓。手中猶有釘空槌在。留兩班。請首座殿主。上堂。齊進退。正紀綱。提向上事。建光明幢。總屬諸人。山僧無分。何故。見成公案。上堂。釋迦老子於波羅奈國。梵王三請。而轉法輪。觀根逗教。分別說三。大似捏窠造偽。瞞驀乎人。柏山向纖塵不立處。捩轉釋迦老子鼻孔去也。長憶江南三月裏。鷓鴣啼處百花香。結制上堂。大方無外。大圓無內。是凡是聖。同此安居。涸涸[泳-永+盾][泳-永+盾]。瞞瞞盱盱。富不足而樂有餘。是馬何曾喚作驢。謝首座秉拂上堂。舉一不得舉二。放過一著。掀翻圓覺伽藍。突出衲僧巴鼻。有利無利。不離行市。黃檗歸第二位坐。南泉休去時如何。陷虎機深。猶深於海。中夏上堂。立中就中。滲漏難盡。不見一法。始是半提。向上全提。諸佛諸祖。明不出。標不起。龍女獻珠。狼藉淨地。還知柏山落處麼。柏禪床一下云。只有黃金無此閑。上堂。三處度夏。開拓封疆。眉毛在麼。抱臧叫屈。柏山今夏。一夏又作麼生。良久云。逢人不得錯舉。浙翁和尚忌。拈香。三回四度。不曾入得徑山門。萬恨千愁。今日落在弟子手。插香云。只得懽喜忍受。謝新舊知客寮元。上堂。旃檀林無雜樹。拈出片片皆香。收來枝枝顯露。門頭戶底。一等打開時如何。良久云。喫茶去。八月旦上堂。是處是慈氏。無門無善財。古人為什麼。三千里外。賣却布單。道不得超宗句。草鞋三文錢買得。中秋上堂。一月普現一切水。一切水月一月攝。從上佛祖。不出這影子。只今雨暗乾坤。拈拄杖云。月明如畫。衲僧眼目瞞他一點不

得。擲下拄杖云。是什麼。

重陽謝大明楷率翁上堂。柏山高。秋風高。打失登山屐。吹落炙脂帽。應節應不及。登高登不到。三十年前。有人笑弄這般鼓笛。豈知今日。以虛空為鼓。須彌為槌。王老師道不打。也只為蛇畫足。諸人要識鹽官麼。卓拄杖云。大明生於東。

開爐上堂。造化寒暑。有來有往。衲僧火爐。有開有閉。寒暑往來。火爐開閉。非實非虛。非如非異。拈拄杖云。只今火爐開也。三世諸佛。六代祖師。向這裏無親炙分。是汝諸人。看甚火色。討甚冷暖。火焰裏藏身。淤泥中出現。又是阿誰。僧堂裏圍爐向火。又是阿誰。喝一喝。下座。

上堂。散為器者。乃道之漓。適於變者。乃法之弊。衲僧家。如何是事事無礙底句。良久云。濟北老禿兵。明州憨布袋。

天基節上堂。一句子天長地久。一句子日照月臨。一句子風調雨順。今晨將此三轉語。効封人三呼之祝。普與盡天地人。同一鼓腹謳歌。更有一句。未到大佛殿。先與諸人說破。恭。

謝淨慈印首座上堂。人天眼目。渥洼真產。踏殺天下人。今古何曾間。馬師不曾過去。衲僧自生隔遠。不隔遠。蜀早不早。蜀有彭漢。

正旦立春上堂。依時及節。歲歲元正啟祚。拈拄杖云。葭管灰飛。勾芒布令。卓拄杖云。春牛頭黃。歲稔年康。

上元謝副寺掌財上堂。一燈明燈燈無盡。燈即己有。光非外來。無內無外。無東無西。照長夜而不息。如居大寶藏中。取之無禁。用之不竭。與麼信得及。與麼擔荷去時如何。良久云。南無燈明如來。

上堂。我若東說西說。你便尋言逐語。藥多病多。我若羚羊掛角。你向甚處捫摸。賊身全露。放憨處鬼神莫測罅縫。交輟時佛祖不奈伊何。圓頓教中。收歸上科。柏山有不如人底句。諸人要知麼。屙屎進前。放尿退後。

謝徑山琰藏主上堂。衲僧相見。或彼或此。水出龍宮。雲生嶽塢。壁立千仞放行。合水和泥把住。仁義道中是第幾句。卓拄杖云。舉。

涅槃上堂。雙林示滅誑何人。無際真空淨法身。活向春風裏埋了。萬年千載不成塵。

上堂。愛聖憎凡。蝸牛上壁。凡聖情盡。獨鶴下田。向外馳求。鄉關轉遠。百尺竿頭。進得一步。脚跟下正好一錘。畢竟如何。如是我聞。一時佛在。

四月旦上堂。罷拈金錫。七尺軍前。今春看又過。何日是歸年。辜負春山啼杜鵑。樊將軍向補陀山上。禮觀音大士。不知不覺。在五

臺峨嵋。見文殊普賢。喝一喝。

佛生日上堂。象駝紅日。龍吐香水。釋迦老子早遭染污了也。說甚天上天下。雲門氣宇如王。未免見塚放箭。柏山破木杓。一滴渾無。作麼生見得清淨法身。雨過千山綠未休。

上堂。寒時寒殺。熱時熱殺。洞山雖則打兔就窠。不顧通身泥水。茫茫普熱。紛紛下雪。雪竇遍界分身。知恩者少。薰風自南來。殿閣生微涼。似這般烏豈。阿誰無一粒兩粒。總過一邊著。拈拄杖右邊。諸人入得。孟夏漸熱。柏山別有管顧。

南劔州興化賢老通法嗣書。上堂。拗折探水杖。不妨到處稱尊。索得已喫棒。方堪入這保社。一信纔通。越南燕北。只如純鋼打就時如何。雙劔化龍。

上堂。柏山小小叢林。安居九十日。五日不陞堂。隔日不入室。與麼承當去。已是拗曲作直。吹糠著米。無賊考賊。沛公鬪智。項羽鬪力。南無甚深般若波羅蜜。

解制上堂。護生殺生。遍界刀鎗。柏山結也如常。解也如常。如常恰似秋風至。無意涼人人自涼。咄。

開爐上堂。草舍家風。少富多貧。牙根齧定。七縱八橫。有爐無火燒殺人。有火無爐走殺人。說甚楊岐鬼眼睛。

雲谷赴聖壽上堂。黃檗歸本位坐。陷虎機深。保壽打推出僧。釣鰲力巨。一舉三山連。未稱全提處。把斷要津。輝騰今古。只如白雲道。若是正法眼藏。釋迦老子亦自無分。且道具什麼眼目。若無猿臂將軍手。爭射林間金僕姑。

因事上堂。人情濃厚道情微。道用人情世豈知。鹽鹹醋酸阿誰不知。只要熟處放教生。生處放教熟。道用人情。日久自然打成一片。猶是蹲坐在淨地上。要得大方獨步。柏山與你草鞋。

上堂。七日來復。宮添一線。衲僧分上作麼生。石笋抽條。冰河發焰。拈拄杖云。柏山拄杖子。放一頭低。與你相見。卓拄杖云。百雜碎。

天基節上堂。天地發祥。聖人應現。如日麗天。無物不照。林下道人。居照臨之下。如何申祝。南嶽萬年藤。

藹八上堂。雪山中夜半子。眼見星醜惡露。四十九年分疎不去。兒孫千古遭塗污。藹八年年是一度。

上堂。展則彌綸法界。收則不立絲毫。語默動靜礙。心思意想礙。喫粥喫飯礙。屙屎放尿礙。被阿脩羅界收攝。因甚不知一切智智清淨。作福不如避罪。喝一喝。

上堂。不在內。不在外。不在中間。無著力處。熱鐵一團。看看拄杖子。轉身吐氣去也。卓拄杖一下。

上堂。識得一萬事畢。把定乾坤。照徹離微則且從。如何是雲龍亭會底句。卓拄杖云。好生聽取。

上堂。一棒一喝。疾雷破山。一提一唱。崩空峭壁。諸佛傍觀有分。諸祖拈掇不出。只如入己還閉。又作麼生。路遙知馬力。事久見人心。

結制上堂。安居禁足。護生殺生。無依倚處。百匝千層。拈拄杖云。柏山手裏有烏藤。

閏月旦上堂。不知月之大小。不管歲之餘閏。黑牛臥死水。癩馬繫枯椿。三年一閏。五年載閏。衲僧須經得與麼時節過。方可成自己歲功。且道憑何為據。春寒秋熱。

臂疾上堂。門掩衰頹又暮春。這些病痛與誰陳。百城若有歸來者。方見文殊一臂伸。

上堂。空空不住。自溺自沉。不重己靈。撞牆撞壁。未話具獅子向上爪牙。便是三家村裏保正。也要你做。

慧老出世竹林上堂。透過祖師關。佛法在掌握。不經齊魯郊。如何望岱嶽。仁心普周被。難與衲僧角。換却鬼眼睛。一著是一著。柏山恁麼道。猶是借水獻花。畢竟如何。義出豐年(乃東嶽行宮。嶽帝常過寺下碁)。

上堂。毗盧師法身主。無纖毫蓋覆。得渠亦不隔礙絲髮許。慈悲喜捨何太苦。不見老大隋云。壞不壞。隨他去。

上堂。歸源性無二。方便有多門。棒如雨點。喝似雷奔。衲僧門下。無著這破草鞋處。經律論又向什麼科中收。移高就下。有箇商量。良久云。白晝長。松風涼。

上堂。火就燥水流濕。問十答百。問一答十。達磨是甚老臊胡。臨濟未是白拈賊。以拄杖劃云。今日為汝一劃劃斷。且道既是冬瓜。為什麼夏裏喫。喝一喝。

上堂。柏山一夏在病。且無東說西話。喚什麼作羹。喚什麼作鼠糞。免得隣壁老宿。咬齒控齟。秋風贏得兩眉橫。

中秋上堂。秋氣澄清。秋空如鏡。萬籟沉寂。明月一輪。盡大地人。徹曉競觀。不知昧却自己光明。所以道。盡十方世界。是沙門眼。盡十方世界。是自己光明。盡十方世界。在自己光明裏。三世諸佛。無量眾生。皆是摩訶般若光。光未發時。無佛無眾生底消息。山河國土甚處得來。長沙岑和尚向諸人眼裏。開張夜市。見價不相當。却來山僧拄杖頭上。貴價精神。賤價賣去也。擲下拄杖云。果然似箇大虫。

上堂。德山棒臨濟喝。拗曲作直。雲門餅趙州茶。特地周遮。威音那畔。毫髮不差。山中是處有黃花。



## 臨安府淨慈報恩光孝禪寺語錄

侍者 志諶 祖閻 編

踞方丈。橫按拄杖云。已<sup>已</sup>是抑下威光了也。盡大地若有一人。不知痛痒。我誓不成正覺。

拈勅黃。君王之寶。人人瞻仰有分。提起云。還見麼。一點恩波。天高地厚。

指法座。象王迴旋。獅子返擲。還他作者。新淨慈年近老大。一步是一步。遂陞座拈香云。此一瓣香。恭為今上皇帝。祝延 聖躬萬歲萬歲萬萬歲。

皇帝陛下。恭願。運天帝之神機。應人王之寶曆。化孚六合。澤被含靈。長懸日月之明。永鎮乾坤之位。跌坐。(問答不錄)乃云。大機圓應。一塵含剎海無邊。大用無虧。一句逗群機無礙。南山蒼翠。湘水瀾漫。上祝一人聖壽。如妙高不動之山。等華藏甚深之海。應指南詢門門解脫。別峰相見。水遠山長。携手大毗盧樓閣中。喝一喝云。不得坐在這裏。雖然明正為南方盡於南。(謝詞不錄)復舉。僧問當山潛和尚。如何是慧日祥光。潛云。此去報恩不遠。僧云。恁麼則蒙師照燭去也。潛云。且喜沒交涉。師云潛和尚前頭照天照地。後頭爍破面門。可惜這僧。倚門傍戶。無承當分。今日有人。問新淨慈如何是慧日祥光。只向他道。山僧今日入院。恁麼則蒙師照燭去也。知恩方解報恩。

小參。播揚大教。還他大力量人。明格外機。須具通方眼目。南山有條鱉鼻蛇。汝等諸人。切須好看。雪峰雖則胸襟流出。坐在荒草中。長慶玄沙雲門知其屈伸。擎頭戴角。展骼蛇之手。一著高一著。未免為蛇畫足。雪竇拈在乳峰前。弄得却活。也不離陳年方法。南山淨地上。不敢狼藉。汝諸人脚跟下。打併淨潔。不妨東行西行。其或未然。觸著傷人毒無藥。(敘謝不錄)復舉臨濟侍德山次。山云。老僧今日困。濟云。寐語作麼。山擬取拄杖。濟掀倒禪床。師云。二大老。龍驤虎驟。雷動風行。用在機先。石火猶鈍。雪竇云。擬向飢鷹爪下分餐。猛虎口中奪肉。敢謂臨濟德山二俱瞎漢。雪竇要向二大老面前。橫行一步。檢點將來。也是贈金以黃。追嚴 徽宗皇帝上堂。至尊至貴。無去無來。體若虛空。迴絕安排。報恩一句。又作麼生。須彌頂上擊金鐘。

上堂。舉古德問僧。何處來。僧云。雪峯來。古德云。我當時到彼。事事不足。而今足也未。僧云足。古德云。粥足飯足。僧無語。

師云古德當時到彼。既道事事不足。因甚勘證這僧。却道粥足飯足。古德可謂相魚拋餌。非惟這僧。不曾親到雪峯。古德當時亦不曾到雪峰。那裏見得。事事不足。

上堂。落賴門風。無你趣向。交輓得行。昧却向上。香巖窮至。無地無錐。與馬大師自從胡亂後三十年。不少鹽醬。是同是別。向這裏咬著舌頭。知得鹽鹹醋酸。拄杖子却向你道。卓拄杖一下。下座。

上堂。即心是佛。非心非佛。東湧西沒。穿皮透骨。十字街頭。孤峰絕頂。是離窠臼。不離窠臼。咄。

上堂。叢林聖制。有解有結。透脫重關。紅爐點雪。

上堂。三脚驢。聖箭子。放行則大地全收。收來則千差一舉。握土成金。握金成土。轉如是輪。不可量數。

八月旦上堂。南來北來。上載下載。且居門外。上門上戶。如卒風暴雨。動便傾漱倒嶽。入得淨慈門。且過未有你著脚分。還知淨慈落處麼。自小持齋今已老。不曾將草按牛頭。

上堂。秋雲捲盡見晴空。瘦聳西湖千萬峰。水鳥樹林南宕寺。老胡曾未到其中。喝一喝。

出隊上堂。貧到無錐。正好進步。王舍城中。有條活路。一聲金錫。千門萬戶。全放全收。全賓全主。多寶如來何曾過去。

上堂。舉茱萸問僧云。為復是游山翫水僧。為復是參禪問道僧。僧云。和尚試道看。萸云。雕鉗鏤蛤不糝之泥。勞君遠至。僧云。通身是鐵。也遭一撓。萸云。降將不斬。師云。辨龍蛇眼正。擒虎兇機全。收放自如。則不無茱萸。這僧真箇。作得主。未到弓折箭盡。當時待他道雕鉗鏤蛤不糝之泥。勞君遠至。只向他道。不妨具眼。撩起便行。不枉踏破遊州獵縣草鞋。

重陽上堂。會則一似等閑。不會則千難萬難。豈不見陶淵明採菊東籬下。悠然見南山。到這裏轉身有路。不妨入廬垂手。

上堂。明頭暗合絕安排。莫厭紅塵撥不開。不見當年分庵主。一聲江上侍郎來。

上堂。舉潭州三角印禪師示眾云。凡說法。須用應時應節。時有僧問。四黃四赤時如何。印云。三月杖頭挑。僧云。為甚麼滿肚貯氣。印云。爭奈一條繩何。僧云。如何得出氣去。印云。直待皮穿。師云。事理明白。應時應節。不得坐在這裏。牙上生牙。爪上生爪。何曾離得這裏。拍禪床右邊云。三角和尚過這邊著。還知淨慈落處麼。天寒久立。

上堂。將無作有。較短為長。土面灰頭。半飢半飽。且恁麼過。若也煙霞路斷。凡聖絕蹤。彈指三下。若向這裏進得一步。待拄杖折却。向汝道。

上堂。謝北山道舊。溪山雖異。雲月是同。透脫聲色。任自西東。十里西湖九里松。

上堂。舉僧問九峰。如何是道。峰云。可通車馬。僧云。如何是道中人。峰便打。僧禮拜。峰便喝。師云。大眾九峰只要話行。不知性命在這僧手裏。

上堂。一法若有。毗盧墮在凡夫。萬法若無。普賢失其境界。一法萬法。若有若無。以拄杖劃云。一劃劃斷。雖然今夜成見菓子。也要你會喫。

雪下上堂。把定乾坤正此時。衲僧猶未副全提。普賢不顧彌天罪。甘自渾身陷鐵圍。南山據案結案。更痛與三十棒。諸人還知此棒落處麼。瑞雪應期。

上堂。言之者失其真。知之者反其愚。有之者乖其性。無之者傷其軀。俊鷹摩霄。豈重雲能礙。六馬奔騰。豈朽索能繫。如其不然。轉身吐氣。道將一句來。良久云。久雨不晴。雲門道筍。

上堂。信脚行。信口道。缺齒老胡。不是達磨。酸風刮地。泥團凍破。有什麼過。喝一喝。

上堂。謝兩堂首座秉拂。新舊知事。延壽堂主。叢林得人。如瑞雪應期相似。蠲疫蕩瘴。慶兆豐年。可以坐享太平。叢林得人。荷負重任。法等食等。永絕飢虐。有紀有綱。如風吹水。一動靜。齊進退。無中覓有。粒粒全真。東山暗號子。楊岐鬼眼睛。

病起上堂。通身是病通身藥。病去依前藥自除。木落秋空山骨露。何須一嘿對文殊。

佛成道上堂。夜半明星。打失眼睛。胡人多詐。未可全憑。遭他冤害。始報不平。且道如何報此不平。提起坐具云。少間大佛殿。不可放過。

立春日。上堂。西天此土。十萬餘程。胡言易會。漢語難明。大洋海裏。從渠競棹孤舟。南山火冷灰寒。糝花枯木。別迎春色。何須葢管灰飛動。香在梅花第一枝。

上堂。歇即菩提。妙淨明心。不從人得。達磨大師向諸人眼裏。大書特書。上大人丘乙己。諸人却向一因煙二人延處尋討。自生違背。即今要見達磨大師麼。喝一喝。

上堂。桃花水。榆莢雨。一點忽來。千花競吐。且道與曹溪流。是同是別。二祖不往西天。達磨不來東土。

上堂。三通鼓罷。簇簇上來。佛法人事。一時周畢。法眼與麼。大似見密說甜。不知鼓未鳴已前。佛法人事。何曾欠少。便與麼承當得去。買草鞋行脚。三千里外。穿却你鼻孔時如何。虛空有盡。

上堂。頭頂天。脚踏地。開口喫飯。鼻孔出氣。死盡活活盡死。百尺竿頭。更進一步。未夢見衲僧巴鼻。達磨迢迢西來。葱嶺迢迢歸

去。拄杖子因甚却在南山手裏。卓拄杖云。眾眼難瞞。

### 小參

結夏小參。過去已過去。明朝是四月十五。未來猶未來。辜負多年破草鞋。須知二千年已前。北斗有柄。二千年已後。靈木無根。三千里外。撥動煙塵。一彈指頃。安家樂業。太平無象。王道無私。於本分中山腰裏轉。且道百二十日長期時如何。雲藏巖竇窄。雷出地聲高。

解夏小參。七月十五已前。住無所住而住。帶角毒蛇橫古路。七月十五已後。去無所去而去。獅子遊行無伴侶。又誰管翠巖眉毛在不在。又說甚萬里無寸草。出門便是草。一毫頭上。如珠走盤。拄杖頭邊。風生八極。到箇裏未是衲僧行履處。如何是衲僧行履處。除夜取涼。六月下雪。

除夜小參。一年將盡夜。萬里未歸人。愁人欲向愁人說。未必愁人真箇愁。楚天空闊稻梁多。一念萬年休歇去。大盡三十日。小盡二十九。路途之樂。盡調到家。南北東西。無可不可。天上天下。惟我獨尊。歸去來歸去來。若是明眼衲僧。掩鼻而去。雙林到此。年窮歲盡。更無絲毫許拈出。烹北禪牛。作東山家宴。猶是倚門傍戶。貧兒思舊債。記得三十年前。撥盡寒爐一夜灰。成得一篇送窮年。未免拈出與諸人分歲。諸人好生聽取。白首儒生困路歧。殘盃冷炙飽還飢。一朝得意春風裏。便把驢兒作馬騎。

結夏小參。行道峰頂。蹤跡全無。照影池邊。毫髮不立。古佛過去久矣。彌勒說甚當來見面。於一漚未發之前。腦門上好與一箭。縱步於經行之處。脚跟下好與一錐。怖影迷頭。望雲無路。劫石有銷日。虛空無盡期。看樓打樓。買帽相頭。九十日內。作麼生見得。形直影端。聲和響順底句。石上涼多新雨過。池邊吟久好風生。

解夏小參。全鋒敵勝。罕遇知音。同死同生。萬中無一。所以德山老漢平生一條脊梁硬似鐵。未免向私商路上拗折。却道若也於已無事。則勿妄求。妄求而得。亦非得也。汝但無事於心。無心於事。則虛而靈。空而妙。若毫端許。言之本末。皆為自欺。雙林今夏安居。若令箇箇無毫髮自欺者。自然步步踏著實地。於心契理真常。山僧撥一座雲黃山。作一椀羹。供養上座。且喜金圈栗棘。實是此間土宜。苟或未然。九十日露柱燈籠。欺汝諸人去也。

至節小參。有物先天地。無形本寂寥。能為萬象主。不逐四時彫。拈拄杖云。大士擊門槌。多年黑似漆。卓拄杖云。君子道長。寒時寒殺闍黎。又卓拄杖云。小人道消。熱時熱殺闍黎。萬里無雲。青



天正好喫棒。三家村裏。明陰洞陽。十字街頭。炭輕土重。一任卜度。且道如何是萬象主。良久云。只在此山中。雲深不知處。解夏小參。九旬禁足。網禽宿巢。三月安居。驅狐守塚。向生殺不到處。現三頭六臂。掀翻圓覺伽藍。猶是抱椿打泊浮雲黃山前。雙檣樹下。九十日內。風以時。雨以時。二六時中。少不添多不減。一年三百六十日。日日安居。時時自恣。圓者自圓。方者自方。長者自長。短者自短。未免淨地揚塵。畢竟如何。大鵬展翅天路遙。巨鰲轉身海水窄。

至節小參。諸佛出世。足陌燒錢。祖師西來。高盤釘菓。以至地凍草枯。水寒冰結。臨濟走過新羅。德山愁眉不悅。盡是普請齋筵。天地未判。吉凶未兆已前。全身檐荷。高超三界。獨步大方。衲僧門下。違時失候了也。只如今夜三通鼓罷。大眾雲臻。坐立儼然時如何。良久云。湘潭雲盡暮山出。巴蜀雪消春水來。

歲除小參。年窮歲盡。自合知時。日往月來。直須頂省。東山大開家宴。北禪烹露地牛。若真箇是窮鬼子。終不上這送窮缸。纖塵不動。把定太歲咽喉。撥亂七十二候。直得臨濟德山灰飛火亂。回避無門。諸人還知承天落處麼。一宵能幾刻。兩歲要平分。

結夏小參。九旬禁足。虛築長城。三月安居。徒銷鋒鏑。向上一路。千聖不傳。真獅子兒。了無籠罩。只如承天。向十字街頭。軟紅塵裏。高叉手。低鞠躬。又作麼生。無人知此意。令我憶南泉。解夏小參。不虛度夏。滄山苦口多甜。再歸終夏。黃檗瞎棒有餌。與麼告報。埋沒宗乘。衲僧家灑灑落落。一日兩粥一飯。誰敢欠少。殿前樹下乘涼。闔閭城中應供。直是威音那畔。描也描不成。聖制告圓。諸人畢竟。所成者何事。飯籬邊多飢人。龍門中多渴者。解開布袋。有箇商量。初秋夏末。千萬為拄杖草鞋保任。若也東去西去。上載下載。無分。不得錯恠承天好。

至節小參。萬機不到。地闢天開。一句當堂。山枯海竭。搯[打-丁+(天/非)]堆中。掘窖埋沒諸人。冰河發焰。石筍抽條。何似洞庭霜後底。諸人看著新年曆日。不問陰極陽生。但要知冬至在何朝。冬菓總少我一分不得。承天今夜滿盤擊出。還諸人了也。且道何時欠諸人底來。若也知得。承天有沒量罪過。若也不知。卓拄杖云。此去洞庭不遠。

結夏。因事小參。見聞覺知無障礙。鐵山當路。聲香味觸常三昧。認奴作郎。百尺竿頭進一步。荒草連天。退一步。洪波浩渺。無風起浪。拗曲作直。天堂未就地獄先成。釋迦老子二千年前。有約法三章。以大圓覺。為我伽藍。身心安居。平等性智。欺胡瞞漢。飢來喫飯。困來打眠。有甚不安居。熱則普天熱。寒則普天寒。有甚不平等。頭頂天腳踏地。尅期取證。證箇什麼。那更鼓聲纔動。汝

等諸人。盡向這裏聚集。少時錯。且道承天錯諸人錯。若也不知。且在此過夏。與你商量。

解夏小參。毗盧樓閣。八字打開。圓覺伽藍。十方通暢。山中九十日。佛法二千年。青絹扇子足風涼。說甚眉毛在不在。是汝諸人。還知慚愧也無。若也不知。還我九十日飯錢來。

至節小參。晷運推移。日南長至。文不加點。迴絕安排。一得永得。無變無遷。伏羲未劃已前。面目儼然。諸佛出世之後。醜拙俱露。洞山菓子。浩老布裩。總是祭鬼神盤釘。印板打就。和麩糶麩。一任諸人搏量。只如縮却項暗嗟吁。又作麼生。一冬二冬叉手當胸。

歲除小參。歇即菩提。妙淨明心。不從人得。雖是陳年曆日。七十二候。二十四氣。一一分明。只為當人信不及。一向奔南走北。尋東覓西。逗到極歲窮年。喝一喝云。達磨在你脚底。

結夏小參。當陽有路。踏著方知。覲面相呈。覲著即瞎。東西十萬。南北八千。塵埃不污玉。靈鳳不啄羶。天然氣槩。向上眼明。盡不可說不可說世界。為自己。不舉一念。超越無邊剎土。如是安居。如是禁足。衲僧門下。未稱全提。這邊那邊。一時拈却。拄杖子現隨類身去也。卓拄杖云。我此嶽塢雲。遍滿大千界。

至節小參。大通智勝佛。作何形狀。十劫坐道場。轉身無路。佛法不現前。不為分外。不得成佛道。且與三十棒。柏山已是向三門外。揖客了也。未言先領。未舉先知。過這邊著。還須盡情放下。如太虛空。空亦不可得。三世情盡。如印印泥。更無前後。一塵不立。要行便行。要坐便坐。撥著轉輾輾地。觸著嗔斗诟地。有甚近傍處。生死不能纏縛。寒暑不可推遷。雖然只今群陰剝盡。一陽復生。又作麼生。喝一喝云。天寒有妨。久立。

歲除小參。萬化不到。枯椿生花。燦發劫外春光。化育一天和氣。便見擊鼓逐除。燒燈守歲。頭頭顯露。著著全超。與麼告報。應時應節。輕易諸人。何故。只為有瞞諸人不得處。非惟柏山瞞諸人不得。從上諸佛諸祖。天下老和尚。亦瞞諸人不得。那裏是瞞諸人不得處。要知麼。臘月三十日。盡頭是歲除夜。

解夏小參。九旬禁足。法出姦生。三月安居。轉生荊棘。火不待日而熱。月不待風而涼。眼因甚看眉毛不見。進水無門。出雲無路。忽然如龍得水。似虎靠山。猶隔千里萬里。解開布袋。有箇商量。西湖十里芰荷香。

至節小參。天地未分。陰陽未兆已前。文彩全彰。便與麼承當去。猶是節後數九。那更截群機於未兆。藏冥運於即化。與四時同一變遷。與八節同一消長。盡大地人。茫茫蹉過。不得打成一片。未免効古人。具辛禮于郊。以迎長至去也。卓拄杖云。樂動黃鍾。

至節小參。繁興大用。舉即全真。陰剝陽生。道消道長。有時撥亂二十四氣。掀翻七十二候。不與萬法為侶。不與凡聖同途。有時明陰洞陽。有時橫三豎四。從無住本。本性圓明。衲僧門下。無非是念。仲冬嚴寒。日南長至。通箇時暄。敢問諸人。黃河為甚連底凍。喝一喝。

## 拈古

舉為山坐次。仰山侍立。為云。寂子近日宗門中令嗣作麼生。仰云。大有人疑著此事。為云。寂子又作麼生。仰云。某甲祇管困來合眼。健即坐禪。所以未曾說著。為云。到這田地也難得。仰云。據某甲見處。著此一句語亦不得。為云。為一人也不得。仰云。自古聖人。盡皆如是。為云。大有人笑汝與麼祇對。仰云。解笑某甲。是某甲同參。為云。出頭作麼生。仰遶禪床一匝。為云。裂破古今。

師云。仰山俊跳處。可謂父子不傳。為山控勒時。直要子承父業。仰山出得頭來。因甚又在模子裏。不見道。賢賢易色。舉為山在方丈內臥。見仰山入來。為乃轉面向裏臥。仰云。某甲是和尚弟子。不用形迹。為作起勢。仰便出去。為召云。寂子。仰乃回來。為云。聽老僧說箇夢。仰低頭作聽勢。為云。為我原看。仰取一盆水。一條手巾來。為遂洗面了纔坐。香巖入來。為云。我適來與寂子作一上神通。不同小小。巖云。某甲在下面。了了得知。為云。子試道看。巖乃點一碗茶來。為歎云。二子神通。過於鶩子。

師云。為山放憨。開眼合眼是夢。二子太殺惺惺。隨夢顛倒。神通過於鶩子。還免形迹也無。拍禪床一下云。休說夢。舉為山僧問。如何是百丈真。為下禪床叉手。又問。如何是和尚真。為上禪床坐。

師云。本來無位次。何用強安排。要識為山麼。孝當竭力。舉高安白水仁禪師示眾云。尋常不欲向聲前句後。鼓弄人家男女。何故。且聲不是聲。色不是色。時有僧問。如何是聲不是聲。仁云。喚作色得麼。僧云。如何是色不是色。仁云。喚作聲得麼。僧作禮。仁云。且道為汝說。答汝話。若人辨得。有箇入處。

師云。水綠山青。鷓鳴鵲噪。本仁剛向遮裏。販賣私商。只貪低價相授。爭奈官有明條。驀拈拄杖。靠却云。放過一著。舉天僊因新羅僧來參。纔展坐具。僊捉住云。未離本國時。道取一句來。僧無語。僊便推出云。問他一句。便道兩句。

師云。只知踏步向前不知笑破人口。

舉石樓因元康和尚來。樓纔見。便収足坐。康云。得恁麼威儀周足。樓云。汝適來見箇什麼。康云。無端被人領過。樓云。是恁麼始為真見。康云。苦哉賺却幾人來。樓便起身。康云。見即見已。動即不動。樓云。盡力道不出定也。康拊掌三下。後有僧。舉似南泉。泉云。天下人斷遮兩箇漢是非不得。若斷得。與他同參。

師云。不遇盤根錯節。不足以別利器。不斷得天下人。斷不得底是非。不足以表大丈夫。有大丈夫底。出來斷看。也要共知。若斷不得。寶林撿條去也。卓拄杖云。一串穿却。

舉貞谿禪師有僧來參。谿豎起拂子云。貞谿老漢。還具眼麼。僧云。某甲不敢見人過。谿云。老僧死在闍梨手裏。僧以手指胸便出。谿云。闍梨參見先師來。至晚谿請喫茶次。僧拈起盞云。遮箇是諸佛出世邊事。作麼生是。未出世邊事。谿以手撥却盞云。到闍梨死在老僧手裏。僧云。五里牌在郭門外。谿云。無故惑亂師僧。僧便起謝茶。谿云。特謝闍梨相訪。

師云。自家屋裏人相逢。便知屋裏事。如鏡照鏡。無毫髮可隱。如水入水。初無異味。然則五里牌在郭門外。阿誰不知。若是佛未出世邊事。更須參取曹山始得。

舉吉州性空禪師。因僧來參。人事了退。空云。與麼下去。還有佛法道理也無。僧云。某甲結舌有分。空云。老僧又作麼生。僧云。素非好手。空便仰身合掌。僧亦合掌。空却拊掌三下。僧拂袖而出。空云。烏不前兔不後。幾人於此茫然走。祇有闍梨達本源。結舌何曾著空有。

師云。這僧拶著。眼光射人。無端依仁由義。遭他描畫。當時待仰身合掌。拂袖便出。直是首尾水灑不著。只如達本源。不著空有。還有佛法道理也無。喝一喝云。不得忙然。

舉本生因僧從太原來。生云。近離那邊。風景如何。僧云。與此間不別。生云。且道此間風景如何。僧云。和尚與某甲不同。生云。蹋破施主草鞋。當為何事。僧無對。生云。即古即今。出箇問處且難。乃至老僧亦出不得。

師云。識得那邊風景。即是遮邊風景。蹋破施主草鞋。即是自己草鞋。是汝諸人。要出箇問處。不得住在此間。不得離却此間。

舉祿青和尚因僧問。不落道吾機。請師道。青云。庭前紅莧樹。生葉不生花。僧無語。青云。會麼。僧云。不會。青云。正是道吾機。為什麼不會。僧作禮。青便打云。須是老僧打你始得。僧又無語。

師云。這僧既問。不落道吾機。因甚祿青却與道。此正是道吾機。啼得血流無用處。不如緘口過殘春。

舉夾山一日瑞巖問。與麼即易。不與麼即難。與麼與麼即惺惺。不與麼不與麼。即居空界。與麼不與麼。請師速道。山云。老僧謾闍梨去也。巖喝云。遮老和尚。如今是什麼時節。便出去。有僧舉似巖頭。頭云。苦哉將我一枝佛法。與麼流將去也。

師云。瑞巖來如雨疾。去似風暴。且不知雲霧裏雷電。巖頭與麼道。不得無過。家貧不知子苦。

舉夾山僧問。如何是相似句。山云。荷葉團團團似鏡。菱角尖尖尖似錐。僧云。不會。山云。風吹柳絮毛毬走。雨打梨花蛺蝶飛。

師云。語帶玄而無路。舌頭談而不談。不無夾山。若是相似句。更喫機撓始得。

舉福州古靈讚禪師問僧甚處來。僧云。城中來。靈云。還知所生父母。在地獄中受苦麼。僧云。某甲特來看。靈云。你作麼生看。僧云。蒼天蒼天。靈喝云。遮裏是什麼所在。要哭便哭。僧云。爭奈父母。在地獄中受苦。靈云。作麼生免得此難。僧云。三十年後。有明眼人。鑒此話在。

師云。古靈能開地獄。不能閉地獄。是以遮僧。出入如同游戲。當時見遮僧。道三十年後。有明眼人。即向道。說甚三十年後。拈棒便打趁。

舉丹霞見龐居士在面前立少時。便出。霞不顧。士却入來。與霞相對坐。霞却向士前立少時。便歸方丈。士云。你入我出。未有事在。霞云。老老大大。出出入入。有甚了期。士云。略無些慈悲。霞云。引得箇老翁。到遮田地。士云。把什麼引。霞乃把住。拈却幞頭云。一似箇師僧。士却將幞頭。在霞頭上云。一似箇俗人。霞應喏喏。士云。猶有昔日氣息在。霞拋下幞頭云。恰似箇烏紗巾。士應喏喏。霞云。昔日氣息爭得忘。士彈指云。動天動地。

師云。坐立出入。挨來拶去。活鱗鱗地。兩不相虧。其奈氣息未除。說甚驚天動地。當時龐居士應喏喏。便喝云。這俗漢。一推推出。且教為幞頭作主。

舉則川一日在方丈內坐。龐居士入來。乃云。祇知端居丈室。不覺僧來參。時川垂下一足。士便出行三步却回。川乃収足。士云。得恁麼自由自在。川云。爭奈我是主人何。士云。阿師祇知有主。不知有客。川喚侍者點茶。士作舞而出。

師云。主賓相稱。應接酌酢。皆中禮節。居士出行三步而入。賓禮不苟。則川伸足垂足。主禮亦盡。若論我是主人。豈容上門上戶。要知末後一盞茶落處麼。迎客不如送客。

舉大同一日。問龐居士云。是箇言語。今古少人避得。祇如居士。還避得麼。士云。喏。同再舉前話。士云。什麼處去來。同云。非



但如今。古人亦有此語。士作舞而出。同云。風顛老。風顛老。自過教誰檢。

師云。大同始終靠定。不能拓開。被居士向窠窟裏一錐。自過教誰檢。大似忍痛還拳。當時見道向什麼處去來。即與道。千萬保重。

舉百靈一日在方丈內坐。龐居士入來。靈便把住云。今人道古人道。作麼生道。士與一掌。靈云。不得道著。士云。道必有過。靈云。還我一掌來。士便近前云。你試下手看。靈珍重出去。

師云。居士一掌。百靈珍重出去。孰優孰劣。若也道得。與你一掌。

舉南陽忠國師因僧問。如何是佛法大意。國師云。文殊堂裏萬菩薩。僧云。不會。國師云。大悲千手眼。

師云。國師雖則鄉談難改。大似頭上安頭。僧云。不會。劈脊便棒。

舉長沙岑和尚。僧問上上人來。如何相見。沙云。如死人手。僧云。如何是上上人行履處。沙云。如死人眼。

師云。可謂竹影掃堦塵不動。月穿潭底水無痕。諸大老。要拈出上上一著。未免氣急殺人。

舉南泉一日上堂云。文殊普賢昨夜三更。起佛見法見。各與二十拄杖。貶向二鐵圍山去也。趙州出眾云。未審和尚棒。教誰喫。泉云。王老師有什麼過。州便禮拜。

師云。南泉為眾竭力。打開大道。與人行。趙州家國同憂。直要絲毫不立。承天不敢強生節目。直情與諸人道。淨地上不許狼藉。

舉韶山僧問如何是一切相。山云。烏飛霄漢白。山遠色深青。僧云。恁麼則一切相去也。山云。我情知你亂會。

師云。韶山前頭好片無瑕玉。遮僧再進一問。便見瑕生。要知韶山麼。不顧眉毛。

舉洛浦僧問。無問無答。請師答話。浦云。你不是丁姚。僧云。謝師答話。浦云。中九下七。

師云。金入金師之手。則無煅煉之失。這僧索價。不知精粗。無星秤上。定什麼斤兩。

舉同安察僧問。學人未曉時機。請師指示。察云。參差松竹煙凝薄。重疊峯巒月上遲。僧擬進語。察云。劔甲未施。賊身已露。僧云。何也。察云。精陽不翦霜前竹。水墨徒誇海上龍。僧遶禪床一匝。大笑而出。察云。閉目食蝸牛。一場酸澀苦。

師云。同安既知賊身已露。因甚著賊。不知閉目食蝸牛。也是賊過後張弓。

舉德山鑿禪師。有僧近前。作相撲勢。山云。恁麼無禮。合喫山僧手裏棒。僧拂袖便出。山云。饒汝如是。也祇得一半。僧轉身。便喝。山便打云。須是我打你始得。僧云。諸方有明眼人在。山云。天然有眼。僧擘開眼云。猫便出去。山云。黃河三千年一度清。

師云。一向棒將去。甚處討德山。遮僧雖則汗馬功高。不知被德山坐在這裏。

舉金峯一日拈起枕头云。一切人喚作枕头。金峯道不是。僧云。未審和尚喚作什麼。峯拈起枕头。僧云。與麼則依而行之也。峯云。你喚作什麼。僧云。枕头。峯云。落在金峯窠裏。

師云要。識金峯麼。澄潭不許蒼龍臥。

舉巖頭因三聖來參。頭云。不用展炊巾。遮裏無殘羹餽飯。聖云。設有向什麼處著。頭便打。聖接住棒。堆放床上。頭拊掌一下。聖將坐具蓋却頭。哭蒼天而出。

師云。勢均力等。各有轉身活路在。二大老分上。正是殘羹餽飯。因甚又如此狼藉。干戈起處。難捲旌旗。

## 法語

### 示瑞侍者(偃谿小師)

瑞上人夏雙徑來柏山求語。即語之曰。黃檗三頓棒。歸宗一味禪。此養子之方。最甚者。一言半句。如生鐵橛。無咬嚼處。又其次者。豈可婆言姐語。金錢美食而事籠絡。同日語耶。爾師據北山。為今代宗主。生鐵門限。綿裹秤槌。不可淺近窺伺。棄親就疎。是資之背師也。非師之罪也。子歸父前無以父子情親可私其傳佛法非私也。儻若獅子教兒。赤壁之崖。俊鷹巢於木末。而自返擲奮飛。則如破鏡之出窠。臨機不見師。方稱乃翁門閥。

### 示心傳二上人往太白

具決定志。必有決定眼目。有決定眼目。必能辨決定大事。異時指四明叢林。為衲子奔赴之海。每冬後春首。必留三四十單位。以待遠方特來者。杖不輕移。足不輕措。所以賣布單。遠趨怡山。而發轉新之笑。於獨眼龍句下。非具決定志。何以至此。決定志具決定眼。正非間關也。太白峯高二十里松不減異時摩穹勢。雖曰樓閣門開。不勞彈指。更須知有入已還閉一關。雖銀山鐵壁可透。此關不可透。作麼生透得此關。決定志勇。更不在柏山饒舌也。

## 示西禪淇上人

昔踈山聞懶安有句無句之語。即賣却布單。不憚勞苦。直造西寺。直欲編辟其詞鋒。不消懶安一笑。踈山更奈何不得。迢迢遙征憤憤氣宇。於此時問道之心何如。懶安非是緘封不密。蓋憐其不能透一笑之關。指獨眼龍為之點破。一時雄據。豈無其人。惟指獨眼龍何耶。以其具向上眼目。識向上機用。如駕萬鈞之弩。在一發耳。則靈鋒寶劍。常露現前。與露迥迥地。豈有異耶。被明招當機點破。方知懶安笑裏有刀。淇上人肄業西寺。研足東西。抑亦有所聞而參尋。或慕大爐鞴而煅煉。舍近取遠。自相背馳。石牛眠處。荔子熟時。參訪心渴。入口便嚙。[噉-糸+石]然一笑。始信懶安。而未嘗亡。獨眼龍不在明招。

## 示祖上人

達磨西來。面壁九年。而得二祖始對之。無他語。惟說久受勤苦。乃可得成。真醜翻毒藥。立雪斷臂。而獲安心。又豈久受勤苦。可到勇猛奮發。在剎那間。而入如來大寂滅海。如臨濟之於黃檗棒下。百丈之於馬祖喝下。非臨濟不能承黃檗之棒。非百丈不能當馬祖之喝。方可振興鼻祖門戶。遊州歷縣。遇著眼目定動底。便如獅子咬人火急。定上座之見欽山。直欲築殺這尿床鬼子。使雪峯巖頭握拳透掌。能擇本分宗匠。本分叢林。忘歲月寒暑勤苦。立決定信。非惟宗匠不辜學者。亦自不負決擇眼目。信若不決。草鞋拄杖亦能欺人。祖上人自徑塢來柏山。求法語。宜以前輩祖師為榜樣。庶可遠到。則使名實相副。柏山與麼道。也是為蛇畫足。衲僧門下。無佛無祖。祖上人惺惺著。

## 偈頌

### 天衣生緣

烹金爐冷歲華更。此地曾經借路行。潮滿沙頭起寒鴈。葛藤芽孽又重生。

### 拜明招塔

稍硬風頭早已乖。更歸暖處自沉埋。翻令千古成蹤跡。枉喫羅山白飯來。



### 水庵生緣

一宿分明不易投。老拳要覓死冤讎。不應荒却娘生也。自是無人敢出頭。

### 拜明教塔

如說而行炳日星。回瀾一柱屹亭亭。湖邊安得磨崖石。只刻尊僧篇作銘。

### 蘇谿牧護坐禪巖

當機突出鴨吞螺。奈此懸崖峭壁何。等是蘇谿蹲坐處。且非蒼檜影婆娑。

### 先羅漢塔

風幡影裏眼麻迷。為是知音却不知。畢竟礙膺除未得。寒松千古替傷悲。

### 佛蹟

石火電光中出沒。崖崩石裂尚難酬。放行一步還知不。佛是西天老比丘。

### 布袋腳跡石上現

名與長江萬古流。當時狼藉若為収。脚跟只為不點地。又浣橋邊塊石頭。

### 韜光庵

唐木猶存腹半空。蒼崖苔是舊時封。雲隨十乘歸伊洛。月照年年湖上峯。

### 靈寔歸蜀

半生清苦衲無畦。惟有莎庭積雪知。眼帶東南海色碧。莫和煙雨看  
峩眉。

### 鄙翁住菁山庵

篝火堆中不善藏。蹲鴟直透九重香。煙雲深鎖菁山塢。輒莫鐘聲送  
夕陽。

### 鰲山接待

到得安眠飽飯中。東西南北路頭通。三更夜半鬼嫁禍。莫著巖頭與  
雪峯。

### 題譙菴(譙令憲見松源)

歷觀嘉泰與開禧。禪苑宗壇更有誰。脩竹蒼松凜寒色。一如問道冷  
泉時。

### 惠山煎茶

瓦瓶破曉汲清冷。石鼎移來壞砌烹。萬壑松風供一啜。自籠雙袖水  
邊行。

### 靈隱得猿

此心未歇最關情。那更猿聲入夜頻。從此飛來峯下寺。又添多少斷  
腸人。

### 鑑維那歸蜀

峨眉月古關情。流入渝江影倍清。塵盡光生湖海客。歸來還與月  
爭明。

### 與福上人

聞名見面不須論。枉到防風縣外村。強半春光煙雨裏。分明閉却柏  
山門。

### 贈壽上人

覓諸方偈眼能乖。不把炊巾亂展開。知得一峯天下秀。元從西竺國飛來。

### 送璉上人

來從衡嶽畫圖間。雙眼無非向上看。放一頭低相見去。方知玉几最高寒。

### 復首座出世。上雪竇

老氣如虹久屈蟠。把茅容易入深山。長庚未話先腸斷。冷債如今要得還。

### 送焦山淇上人見廣祐

雲團廣祐盡愁城。未必心肝鐵打成。話著石公山下事。定如猿叫第三聲。

### 送鴈宕慶藏主

四十九盤飛鳥外。衲衣猶帶宕雲寒。豁開湖海煙波眼。枯木石頭在鴈山。

### 珙上人求

西風吹雨滿吳天。不犯竿絲一釣船。寂寞要貪香餌味。江湖浮動幾蓑煙。

### 了翁

先師公案強名模。不解深藏負累渠。是我殺人便償命。如何年老解心孤。

### 古鏡

不知經幾劫塵侵。元本形模莫辨明。一片青銅銷得盡。無揩磨處始光生。

### 夢宅

六窻深閉大槐宮。一枕清風瞬息中。窮劫至今佛與祖。樓頭知是幾聲鐘。

### 幻菴

虛空迸裂海乾枯。人在漚花影裏居。合眼黃昏開眼晝。月明何許上珊瑚。

### 瞎翁

道得更無心外法。首山有眼且無光。拍盲枷棒揮將去。匝地普天興禍殃。

### 古航

片帆不是等閑開。衝破洪波白浪堆。眨上眉毛千萬劫。有誰洗脚上舡來。

### 壽秀王八十

道尊宗翰玉亭亭。益固維城重典刑。八十手扶靈壽杖。咸瞻南極老人星。

### 隱室

文殊親到見非親。蹤跡渾無礙塞人。一丈方方遮障了。如何彈擊現全身。

### 讚佛祖

### 出山相

子夜逾城。午夜見星。青天白日。大道不行。水泥脚下轉深深。究竟何曾得道成。

### 行道觀音

盡聞不住。業識忙忙。空所空滅。遍界難藏。特地經行往那方。

### 獅子相觀音

獅子國中。隨類度生。盤石海潮。呵吼不停。要見真獅子兒。於斯觀其音聲。

### 魚籃觀音

徒整春風兩鬢垂。子規啼遍落花枝。龍門上客家家是。錦鯉携來賣與誰。

### 觀音

十方圓明。應現非一。眼看淨瓶。坐盤陀石。楊枝入手時。一滴是一滴。

### 踏蓮葉觀音

剎海無數。分身遍普。蓮華葉上。如日卓午。應作如是觀。圓通二十五。

### 布袋和尚(三)

拖布囊。握烏藤。街頭市尾。不是閑行。  
靠布袋作夢。有甚惺惺處。若遇當行家。喚醒喫茶去。  
一肩擔荷非輕。是什麼破落索。雖然顧後瞻前。不知打失樓閣。

### 渡蘆達磨(二)

江水無極。莖蘆可折。離了梁朝。未到魏闕。此恨波心向誰說。  
破六宗邪。開五葉花。西天此土。地無硃砂。



## 豐干

跨猛處去來。與寒拾來去。賊火不勘。自相訐露。謂是彌陀。有何憑據。

## 寒山

五字忍飢吟。十年忘歸路。著不著大笑。一場吐不出。相似底句。是真文殊。無二文殊。蘇盧唵唎。唵唎蘇盧。

## 拾得

來無地頭。去有蹤跡。笑不省是什麼意。掃不盡幾多狼藉。苦海無邊。行願無邊。喚作普賢。即非普賢。

## 寒拾(放帚。坐對崖石。看月)

放下苕帚。對坐巖穴。眼看不停。口說不歇。想得峨眉五臺。無此一天明月。

## 船子和尚

不是輕舟蕩漾戲。一撓未展命如絲。雙眸罔罔煙波外。伶俐闍梨欲到時。

## 郁山主

拾得明珠笑口開。謂言塵盡轉塵埃。若無直下承當分。孤負驢兒一擲來。

## 政黃牛

江海歸來知幾年。却從牛背看風煙。十成一轉倒跟語。萬象終難舉得全。

## 朝陽穿破衲(二)

檻褻衣能多少。破不盡補不了。新羅夜半日輪紅。線路何曾穿得透。

骨相寒。毳寒衲。不朝陽。難提掇。正與麼時。大地火發。

### 對月了殘經(二)

月在天。字在紙。於此經。了也未。口如鼻孔眼如眉。依前坐在光影裏。

心洞明。眼豁開。末後句。絕安排。未曾展卷。明月自來。

### 無準和尚

奮身鐵色。飛崖倒戈。欠蹄少角。得贖翁之聰。而震忽雷。乘雲巢之雲。而撒巨雹。遠若可親。邇而愈邈。拈死柴頭。煨文武火。而起龍宮之烈焰。以廣長舌。談真聖諦。而被天子之恩渥。或謂為密庵破庵跳籬驀[牖-片+土]之克家。豈知是脩水黃梅。寒霜冷燄之超卓者也。

### 大歇和尚

擔一字板。喪却生涯。見贖翁頂門有竅。識秘魔手裏無叉。霹靂震驚。幾蟄龍蛇。信手方圓。了無痕瑕。回垂天之雲翼。念寶林之故家。掃狐兔陸梁之區。輕重輸經界之際。俾禱陰永蔚。槁面生霞。若非鐵樹生花。安能如是耶。

### 東坡

難將得喪動天常。儻耳安然似玉堂。來往借書仍借笠。不知兩步瘴煙鄉。

### 淵明

田園稔久已荒蕪。歸去來兮自荷鋤。眼底悠然見無見。黃花歲歲狀難如。

### 楊知府

丹成於太初之先。道濟乎後地之極。負勳名閥閱之寄。忘生長富貴之習。時行時止。無固無必。操須彌之筆。亦難寫此瑤璋之質。

### 小佛事

#### 心監寺入塔

了却心。山嶽沉。出生入死。游戲縱橫。便與麼去時如何。石函巖下骨。千古不磨名。

#### 定典座入塔

定本無門。從何而入。放下筮籬木杓。藏身了無蹤跡。颺下骨云。為有這些靈骨。

#### 權上座火

提起火把云。有權有實。有賓有主。箇樣伶俐衲僧。點著便知落處。且道以何為據。烈燄亘天紅。無你棲泊處。

#### 貫上座起龕

兩箇五百。元是一貫。無端東覓西尋。逗到冷泉亭畔。爐鞴炎炎。如何得入。貫上座旗鼓動也。

#### 潤維那入塔

山腰石有千年潤。井底泉無一日乾。向這裏直下承當。便見靈骨儼然。錢是足陌。潤維那磬聲斷後。不得返悔。

#### 凝知客火

一片虛凝。天花亂雨。電光影裏。送往迎來。要且不知茶盞落處。凝知客諾。喫茶去。

#### 廣老宿火

生死海。最廣深。擬津濟。遭漂沉。一漚未發已前。忽然火發時如何。擲下火炬云。開眼也著。合眼也著。

### 宗南谷首座秉炬

得處雖同用不同。玄關向上振高風。始終一節難移換。生死去來游戲中。放行則易。四海一律。把住則難。中流砥柱。慣經惡拳踢於玉几芝峰。分座提綱宗於湖山雙徑。指出蔭涼大樹。開鑿眼目人天。雖然不入水牯群隊。愈彰獅子威寧。霜枯雪老。夢破更殘。末後全提。電光石火。眨得眼來。古佛過去。

### 育王無住和尚起龕

最初一步絕安排。問著機鋒劈面來。業債從茲遮不得。向人平白起風雷。佛慧得處佛照不知。佛慧用處退谷不會。出沒卷舒。長行三昧。六住名山。無住而住。大行此道。不行而行。拶到年窮歲盡。驀然弩發千鈞。凡聖不知蹤。疑殺天下衲子。虛空曝地脫。全彰玉几主人。只今要見佛慧禪師移身則易。要見佛慧禪師換步則難。也不難也不易。靈蹤不在猿啼處(辭世頌云。凡聖不知蹤。虛空曝地脫)。

### 承天石山和尚入祖堂

藥山大人相。涅槃後有。水洒不著。描畫不就。石山直下兒孫。自是脫離窠臼。轉位回機。入廬垂手。夜明簾外草芊芊。琉璃殿上月皎皎。只這是石山大人相。死生來去不曾移。還受安排也無。呈起牌云。題目分明。

介石和尚語錄(終)

---

## [CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

## [前往捐款](#)

---

## 信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

---



## 劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

---

## 線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

---

## 支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".

---